



170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

C40-4514

了翁上座請大藏及百家書置之武州紫雲山
我微妄喜陞府中永為學者不敢許出院內
當山二世鐵牛機譯記



B 64853

妙法蓮華經合論卷第六

姚秦三藏法師鳩摩羅什譯

論 宋寶覺圓明禪師惠洪造

附論 宋丞相無盡居士張商英撰

妙法蓮華經隨喜功德品第十八

爾時彌勒菩薩摩訶薩白佛言世尊若有善男子善女人聞是法華經隨喜者得幾所福而說偈言世尊滅度後其有聞是經若能隨喜者爲得幾所福爾時佛告彌勒菩薩摩訶薩阿逸多如來滅後若比丘比丘尼優婆塞優婆夷及餘智者若長若幼聞是經隨喜已從法會出至於餘處若在僧坊若空閑地

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

三九九十七

若城邑巷陌聚落田里如其所聞爲父母宗親善友知識隨力演說是諸人等聞已隨喜復行轉教餘人聞已亦隨喜轉教如是展轉至第五十阿逸多其第五十善男子善女人隨喜功德我今說之汝當善聽若四百萬億阿僧祇世界六趣四生衆生卵生胎生濕生化生若有形無形有想無想非有想非無想無足二足四足多足如是等在衆生數者有人求福隨其所欲娛樂之具皆給與之一一衆生與滿闍浮提金銀琉璃碑磲瑪瑙珊瑚琥珀諸妙珍寶及象馬車乘七寶所成宮殿樓閣等是大施主如是布施滿八十年已而作是念我已施衆生娛樂之具隨意所欲

然此衆生皆已衰老年過八十髮白面皺將死不久我當以佛法而訓導之卽集此衆生宣布法化示教利喜一時皆得須陀洹道斯陀含道阿那含道阿羅漢道盡諸有漏於深禪定皆得自在具八解脫於汝意云何是大施主所得功德寧爲多不彌勒白佛言世尊是人功德甚多無量無邊若是施主但施衆生一切樂具功德無量何況令得阿羅漢果佛告彌勒我今分明語汝是人以一切樂具施於四百萬億阿僧祇世界六趣衆生又令得阿羅漢果所得功德不如是第五十人聞法華經一偈隨喜功德百分千分百千萬億分不及其一乃至算數譬喻所不能知

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9 200

論曰佛將顯發菩提信心功德之勝而彌勒菩薩乃問隨喜者得幾所福發菩提信心者如王者之子王相具足受用如意其隨順喜悅者如近侍之臣屬也先及近侍臣屬之勢力則知王子之尊貴譬如市監之履猶履其瘦處則知肥處經言是諸人等聞已隨喜復行轉教餘人聞已亦隨喜轉教如是展轉至第五十佛必以五十人爲品量者謂菩薩十信十住十行十回向十地也然皆不出乎初發菩提信心之中而巴華嚴論曰初發心者志樂智德含一切諸佛智德體用始成一念初發心告薩之位以初發心境與心不二若志樂毫釐不

似如來所修法身悲智願行者不名初發心菩薩故經言其第五十善男子善女人隨喜功德我今說之乃至但施衆生一切樂具功德無量況令得阿羅漢果者於諸衆生盛年則施以樂具滿其欲及其頽齡則教以道果救其衰以是爲施福德宜多然猶不及是第五十人聞經一偈隨喜功德乃至千萬億分之一豈非三界味著之染幻妄而非真實三乘息滅之樂方便而非究竟也哉華嚴論又曰校量發心功德廣大之量設使於等虛空無限之境以土切樂具總用供養無限之衆生令得天人勝樂又教令得四沙門果辟支佛果及三乘

出世菩薩之果滿虛空界而所度衆生亦等然未
令所化衆生得成佛者亦不可比於此經中初發
心乘者發菩提信心無有優劣而此經與華嚴經
校量功德多寡不同者豈非佛以法華爲對三乘
菩薩說爲隨宜所說者耶

阿逸多如是第五十人展轉聞法華經隨喜功德尚
無量無邊阿僧祇何況最初於會中聞而隨喜者其
福復勝無量無邊阿僧祇不可得比又阿逸多若人
爲是經故往詣僧坊若坐若立須臾聽受緣是功德
轉身所生得好上妙象馬車乘珍寶輦輿及乘天宮
若復有人於講法處坐更有人來勸今坐聽若分座

令坐是人功德轉身得帝釋坐處若梵王坐處若轉
輪聖王所坐之處阿逸多若復有人語餘人言有經
名法華可共往聽卽受其教乃至須臾間聞是人功
德轉身得與陀羅尼菩薩共生一處利根智慧百千
萬世終不瘖痙口氣不臭舌常無病口亦無病齒不
垢黑不黃不疎亦不缺落不差不曲唇不下垂亦不
褰縮不麌澀不瘡脰亦不缺壞亦不渴斜不厚不大
亦不黧黑無諸可惡鼻不匾匱亦不曲戾面色不黑
亦不陷長亦不窊曲無有一切不可喜相唇舌牙齒
悉皆嚴好鼻脩高直面貌圓滿眉高而長額廣平正
人相具足世世所生見佛聞法信受教誨阿逸多汝

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

且觀是勸於一人令往聽法功德如此何況一心聽說讀誦而於大眾爲人分別如說修行余時世尊欲重宣此義而說偈言

若人於法會得聞是經典乃至於一偈隨喜爲他說如是展轉教至于第五十最後人獲福今當分別之如有大施主供給無量衆具滿八十歲隨意之所欲見彼衰老相髮白而面皺齒疎形枯竭念其死不久我今應當教令得於道果卽爲方便說涅槃真實法世皆不牢固如水沫泡談汝等咸應當疾生厭離心諸人聞是法皆得阿羅漢具足六神通三明八解脫最後第五十聞一偈隨喜是人福勝彼不可爲譬喻

如是展轉聞其福尚無量何況於法會初聞隨喜者若有勸一人將引聽法華言此經深妙千萬劫難遇卽受教往聽乃至須臾聞斯人之福報今當分別說世世無口患齒不疎黃黑唇不厚塞缺無有可惡相舌不乾黑短鼻高脩且直額廣而平正面目悉端嚴爲人所喜見口氣無臭穢優鉢華之香常從其口出若故詣僧坊欲聽法華經須臾間歡喜今當說其福後生天人中得妙象馬車珍寶之輦輿及乘天宮殿若於講法處勸人坐聽經是福因緣得釋梵轉輪座何況一心聽解說其義趣如說而修行其福不可限論曰推經之旨以五十人者象十信初發菩提心

之位則知最初於會中聞經者爲象十地滿心菩薩也何以知之以十地滿心菩薩聞經親於三賢也經言往詣僧坊若坐若立須臾聽受者以象十信猶爲踈遠况三賢十地乎然經號一佛乘一佛乘之微妙既已超越三乘則其聞熏之報蓋皆微妙也故經言轉身得上妙象馬車乘珍寶輦輶及乘天宮此皆帝王所服御者其因但以爲是經故往詣僧坊而已又非能至講法之處也故言若復有人於講法處坐更有人來勸令坐聽若分座令坐是人轉身得帝釋坐處若梵王坐處若轉輪聖

王所坐之處則知講法之處爲賢於僧坊矣以此經於諸經中爲王故其聞熏之報亦尊勝故也金剛般若經曰佛言以七寶滿恒河沙數三千大千世界以用布施得福多不須菩提言甚多世尊佛告須菩提若善男子善女人於此經中乃至受持四句偈等爲他人說而此福德勝前福德無著菩薩釋之曰如來廣攝異根故以有一類貪著福德福德殊勝則此經示一佛乘之法對三乘之衆校功德於坐立須臾之間者亦廣攝異根之意也歟問曰轉身得與陀羅尼菩薩共生一處則知聞持

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

之力勝然特又叙眼耳鼻舌身意何也曰以示今
凡夫衆生聞持之力勝則有一生現證六根清淨
者所言轉身者如諸天之生不經中陰是也然未
若不用轉身而證者將示六根清淨故言利根智
慧則意之功德也言不瘡痘不瘡脢則舌之功德
也脢者宋玉曰中唇謂之脢言鼻脩高直則鼻之
功德也言見佛則眼之功德也而聞法則耳之功
德也其餘則身之功德六根功德具矣清淨之妙
所自出也譬如取酪者必先設乳何以故以酪出
於乳中故

無盡居士論曰親聞佛說者功德既如彼於併城

後聞說是經隨順歡喜展轉教人其福無量乃至
須臾聽受勸人坐聽以至往聽所得功德倍倍殊
勝或爲天人或爲釋梵世世所生人相具足予聞
聽法華者耳根不壞誦者舌根不壞此其見於世
者班班可歎也今以儒書攷之洪範曰威用六極
百響用五福五福者壽也富也康寧也攸好德也考
終命也六極者玄短折也疾也憂也貧也惡也弱
也以洪範而推釋氏之因果則華梵一也何以言
之生而玄幼而短折與夫百年而壽攸好德與夫
以惡駭天下康寧之與疾病此豈人力所致哉殃
慶之來有所自矣况其於妙法華經信而持之聞

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

而喜之不恠不妬樂與人共則功德之報可量也哉

妙法蓮華經法師功德品第十九

爾時佛告常精進菩薩摩訶薩若善男子善女人受持是法華經若讀若誦若解說若書寫是人當得八百眼功德千二百耳功德八百鼻功德千二百舌功德八百身功德千二百意功德以是功德莊嚴六根皆今清淨

論曰首楞嚴經曰阿難云何名爲衆生世界世爲遷流界爲方位汝今當知東西南北東南西南東北西北上下爲界過去未來現在爲世方位有十

流數有三一切衆生織妄相成身中貿遷世界相涉而此界性設雖十方定位可明世間祇目東西南北上下無位中無定方四數必明與世相涉三四四三宛轉十二流變三疊一十百千總括始終六根之中各各功德有千二百阿難汝復於中克定優劣如眼觀見後暗前明前方全明後方全暗左右旁觀三分之二統論所作功德不全三分言功一分無德當知眼唯八百功德如耳周聽十方無遺動若邇遙靜無邊際當知耳根圓滿一千三百功德如鼻艱聞通出入息有出有入而缺中交驗於鼻根三分缺一當知鼻唯八百功德如舌宣

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

揚盡諸世間出世間智言有方分理無窮盡當知
舌根圓滿一千二百功德如身覺觸識於違順合
時能覺離中不知離一合雙驗於身根三分缺一
當知身唯八百功德如意默容十方三世一切世
間出世間法唯聖與凡無不包容盡其涯際當知
意根圓滿一千二百功德問曰三四四三宛轉十
二流變三疊一十百千何以通之曰以觀一千百
千則三疊流變千二百之數自具非外來也所言
衆生世界三四四三宛轉流變則成十二此第一
疊也於十二之上各增上八百二十此第二疊
也於十二之上各又增百爲千二百矣此第三疊

也續言以是功德莊嚴六根則爲有法今詳細分
辨錙銖校量者欲示有法本自體空之妙故又言
皆令清淨清淨者遮空之辭也瑜伽論曰眼不能
見色耳不能聞聲鼻不能嗅香舌不能嘗味身不
能覺觸意不能知法於此亦無能任持驅役者以
是觀之則六根果空空則無法也諸佛妙義難以
父母一言而盡故前聖則有方便使之生解以盡其情
長建言以遣其執情忘執滅則解自弄六根功德所
在以清淨其旨見於下文

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

頂亦見其中一切衆生及業因緣果報生處悉見悉知爾時世尊欲重宣此義而說偈言

若於大衆中以無所畏心說是法華經汝聽其功德是人得八百功德殊勝眼以是莊嚴故其目甚清淨父母所生眼悉見三千界內外彌樓山須彌及鍊圍併諸餘山林大海江河水下至阿鼻獄上至有頂處其中諸衆生一切皆悉見雖未得天眼肉眼力如是論曰父母所生之眼肉眼也肉眼何緣清淨耶曰以眼不能自見故中觀論曰是眼不能自見其已體若不能自見云何見餘物以是知其空而言清淨者遮空之辭也然則何以能見三千大千世界

乃至一切衆生及業因緣果報生處悉見悉知乎曰以精進之力成就則自然證知晉僧法賢者天挺神俊博通經論秦太子弘延至東宮與鳩摩羅什議論什莫敢觸其鋒太子旣崇尚出入宮闈者三千僧賢獨靜退類而已偶謂弟子曰昨見天竺五舶俱發衆聞之以爲顯異而賢有弟子自言得阿那含果主事僧碧道洹者倡於衆曰佛不聽計說已所得五舶之語何以窮詰又弟子詎惑妄生同異於律有違理不同止賢答與慧觀等四十輩渡江姚興驚詬碧等使人追之不及至江陵少留而五舶尋果至矣賢亦父母所生肉眼也

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

復次常精進若善男子善女人受持此經若讀若誦若解說若書寫得千二百耳功德以是清淨耳聞三千大千世界下至阿鼻地獄上至有頂其中內外種種語言音聲象聲馬聲牛聲車聲啼哭聲愁嘆聲螺聲鼓聲鐘聲鈴聲笑聲語聲男聲女聲童子聲童女聲法聲非法聲苦聲樂聲凡夫聲聖人聲喜聲不喜聲天聲龍聲夜叉聲乾闥婆聲阿脩羅聲迦樓羅聲緊那羅聲摩睺羅伽聲火聲水聲風聲地獄聲畜生聲餓鬼聲比丘聲比丘尼聲聲聞聲辟支佛聲菩薩聲佛聲以要言之三千大千世界中一切內外所有諸聲雖未得天耳以父母所生清淨常耳皆悉聞知

如是分別種種音聲而不壞耳根爾時世尊欲重宣此義而說偈言
 父母所生耳清淨無濁穢以此常耳聞三千世界聲
 象馬車牛聲鐘鈴螺鼓聲琴瑟箜篌聲簫笛之音聲
 清淨好歌聲聽之而不著無數種人聲聞悉能解了
 又聞諸天聲微妙之歌音及聞男女聲童子童女聲
 山川險谷中迦陵頻伽聲命命等諸鳥悉聞其音聲
 地獄衆苦痛種種楚毒聲餓鬼飢渴逼求索飲食聲
 諸阿脩羅等居在大海邊自共言語時出于大音聲
 如是說法者安住於此間遙聞是衆聲而不壞耳根
 十方世界中禽獸鳴相呼其說法之人於此悉聞之

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

其諸梵天上光音及徧淨乃至有頂天言語之音聲法師住於此悉皆得聞之一切比丘衆及諸比丘尼若讀誦經典若爲他人說法師住於此悉皆得聞之復有諸菩薩讀誦於經法若爲他人說撰集解其義如是諸音聲悉皆得聞之諸佛大聖尊教化衆生者於諸大會中演說微妙法持此法華者悉皆得聞之三千大千界內外諸音聲下至阿鼻獄上至有頂天皆聞其音聲而不壞耳根其耳聰利故悉能分別知持是法華者雖未得天耳但用所生耳功德已如是論曰父母所生常耳常耳何緣清淨耶曰以耳根無覺知故智度論曰聞者如何聞用耳根聞耶用

耳識聞耶用意識聞耶若耳根聞耳根無覺知故不應聞若耳識聞耳識一念故不能分別不應聞若意識聞意識不能聞何以故先五識識五塵然後意識識意識不能識現在五塵唯識過去未來五塵若意識識現在五塵者聾盲人應識聲色何以故意識不破故以是知其空而言清淨者遮空之辭也然則何以能聞於三千大千世界中一切內外所有諸聲曰以精進之力成就自然證知唐西域僧無畏者以開元中至長安明皇延見加禮敬焉問曰法師遠來良苦欲何所止住對曰聞西明寺僧道宣持律甚嚴願往親近於是明皇詔館

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

于西明宣燕坐一室清如冰雪而無畏飲啖無所擇嘗醉吐坐褥誼笑無度宣厭苦之一夕捫虱投于地無畏絕叫曰律師撲殺佛子我聞其聲不忍其苦於是宣起作禮知其神異而師事之無畏亦父母所生之常耳也

復次常精進若善男子善女人受持是經若讀若誦若解說若書寫成就八百鼻功德以是清淨鼻根聞於三千大千世界上下內外種種諸香須曼那華香闍提華香末利華香薺葛華香波羅羅華香赤蓮華香青蓮華香白蓮華香華樹香果樹香栴檀香沉水香多摩羅跋香多伽羅香及千萬種和香若末若丸

若塗香持是經者於此間住悉能分別又復別知衆生之香象香馬香牛羊等香男香女香童子香童女香及草木叢林香若近若遠所有諸香悉皆得聞分別不錯持是經者雖住於此亦聞天上諸天之香波利質多羅拘鞞陀羅樹香及舅陀羅華香摩訶舅陀羅華香舅殊沙華香摩訶舅殊沙華香栴檀沉水種種末香諸雜華香如是等天香和合所出之香無不聞知又聞諸天身香釋提桓因在勝殿上五欲娛樂嬉戲時香若在妙法堂上爲忉利諸天說法時香若於諸園遊戲時香及餘天等男女身香皆悉遙聞如是展轉乃至梵世土上至有頂諸天身香亦皆聞之

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

聞諸天所燒之香及聲聞香辟支佛香菩薩香諸佛身香亦皆遙聞知其所在雖聞此香然於鼻根不壞不錯若欲分別爲他人說憶念不謬爾時世尊欲重宣此義而說偈言

是人鼻清淨於此世界中若香若臭物種種悉聞知須曇那闍提多摩羅栴檀沈水及桂香種種華果香及諸衆生香男子女人香說法者遠住聞香知所在大勢轉輪王小轉輪及子羣臣諸宮人聞香知所在身所著珍寶及地中寶藏轉輪王寶女聞香知所在諸人嚴身具衣服及瓔珞種種所塗香聞香知其身諸天若行坐遊戲及神變持是法華者聞香悉能知

諸樹華果實及蘇油香氣持經者住此悉知其所在諸山深險處栴檀樹華敷衆生在中者聞香悉能知鐵圍山大海地中諸衆生持經者聞香悉知其所在阿脩羅男女及其眷屬鬪諍游戲時聞香皆能知曠野險隘處師子象虎狼野牛水牛等聞香知所在若有懷妊者未辨其男女無根及非人聞香悉能知以聞香力故知其初懷妊成就不成就安樂產福子地中衆伏藏金銀諸珍寶銅器之所盛聞香悉能知種種諸瓔珞無能識其價聞香知貴賤出處及所在天上諸華等曇那闍曇殊沙波利質多樹聞香悉能知

天上諸宮殿上中下差別衆寶華莊嚴聞香悉能知
天園林勝殿諸觀妙法堂在中而娛樂聞香悉能知
諸天若聽法或受五欲時來往行坐卧聞香悉能知
大女所著衣好華香莊嚴周旋遊戲時聞香悉能知
如是展轉上乃至於梵世入禪出禪者聞香悉能知
光音徧淨天乃至於有頂初生及退沒聞香悉能知
諸比丘衆等於法常精進若坐若經行及讀誦經典
或在林樹下專精而坐禪持經者聞香悉知其所在
菩薩志堅固坐禪若讀誦或爲人說法聞香悉能知
在在方世尊一切所恭敬愍衆而說法聞香悉能知
衆生在佛前聞經皆歡喜如法而修行聞香悉能知

雖未得菩薩無漏法生鼻而是持經者先得此鼻相
論曰父母所生之鼻非無漏法生之鼻何緣清淨
耶曰以鼻亦身相觸觸難分故以爲鼻則雙爪之
形不在身外以爲身則唯聞香臭身鼻兩種無系
屬故首楞嚴經曰阿難今汝心中以何爲鼻爲取
肉形雙爪之相爲取觸聞動搖之性若取肉形肉
質乃身身知卽觸若身非鼻名觸卽塵鼻尚無名
云何立界若取觸知又汝心中以何爲知以肉爲
知則肉知之元觸非鼻以空爲知空則自知肉應
非覺如是則應虛空是汝汝身非知今日阿難應
無所在以香爲知知自屬香何預於汝若香臭氣

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

必生汝鼻則彼香臭二種流氣不生伊蘭及栴檀
木二物不來汝自艱鼻爲香爲臭臭則非香香應
非臭若香臭二俱能聞者則汝一人應有兩鼻對
我問道有二阿難誰爲汝體以是知其空而言清
淨者遮空之辭也然則何以能聞於三千大千世
界上下內外種種諸香曰以精進之力成就自然
證知龍勝菩薩未出家時嘗從外道學隱形之法
外道秘不肯傳龍勝苦求不已乃以藥三丸授之
曰用竭復來因教以服食之法龍勝研碎一丸艱
之凡用藥材九十三種皆知名件龍勝亦父母所
生之鼻也

復次常精進若善男子善女人受持是經若讀若誦
若解說若書寫得千二百舌功德若好若醜若羨不
羨及諸苦澀物在其舌根皆變成上味如天甘露無
不羨者若以舌根於大衆中有所演說出深妙聲能
入其心皆令歡喜快樂又諸天子天女釋梵諸天聞
是深妙音聲有所演說言論次第皆悉來聽及諸龍
龍女夜叉夜叉乾闥婆乾闥婆女阿脩羅阿脩羅
女迦樓羅迦樓羅女緊那羅緊那羅女摩睺羅伽摩
睺羅伽女爲聽法故皆來親近恭敬供養及比丘比
丘尼優婆塞優婆夷國王王子羣臣眷屬小轉輪王
大轉輪王七寶千子內外眷屬乘其宮殿俱來聽法

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

以是菩薩善說法故婆羅門居士國內人民盡其形壽隨侍供養又諸聲聞辟支佛菩薩諸佛常樂見之是人所在方面諸佛皆向其處說法悉能受持一切佛法又能出於深妙法音爾時世尊欲重宣此義而說偈言

是人舌根淨終不受惡味其有所食噉悉皆成甘露以深淨妙聲於大眾說法以諸因緣喻引導衆生心聞者皆歡喜設諸上供養諸天龍夜叉及阿脩羅等皆以恭敬心而共來聽法是說法之人若欲以妙音徧滿二千界隨意卽能至大小轉輪王及千子眷屬合掌恭敬心常來聽受法諸天龍夜叉羅刹毗舍闍

亦以歡喜心常樂來供養梵天王魔王自在大自在如是諸天衆常來至其所諸佛及弟子聞其說法音常念而守護或時爲現身

論曰以舌根於大眾中有所演說出深妙聲又能變諸異味爲甘露味而皆父母所生之舌何緣清淨耶曰以不知音聲所從來甘露味所依止故若音聲所從舌根來耶舌及耳鼻皆具於面不從耳鼻來而從舌根來耶若不從舌根來耳鼻應能語言何以故以俱是面相故以甘露上味依止舌根耶則遇世雜味應不推移酸苦淡變生無常畢竟上味何所依止華嚴經曰諸天子如此音聲不

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

從東方來不從南西北方四維上下來業報成佛
亦復如是非十方來諸天子譬如汝等昔在地獄
地獄及身非十方來但由於汝顛倒惡業愚癡纏
縛生地獄身此無根本無有來處以是知其空而
言清淨者遮空之辭也然則何以信其若欲以妙
音徧滿三千界隨意卽能至曰以精進之力成就
自然證知晉僧道生者隱於姑蘇虎丘山欲講涅
槃經患無聽徒乃豎石爲講之至闡提人亦有佛
性普告曰如我所說義契佛心不於是衆石作首
肯之狀以生能令石亦肯首則妙音隨意可至無
疑矣道生亦父母所生之舌也

復次常精進若善男子善女人受持是經若讀若誦
若解說若書寫得八百身功德得清淨身如淨琉璃
衆生喜見其身淨故三千大千世界衆生生時死時
上下好醜生善處惡處悉於中現及錢圖山大錢圖
山彌樓山摩訶彌樓山等諸山及其中衆生悉於中
現下至阿鼻地獄上至有頂所有及衆生悉於中現
若聲聞辟支佛菩薩諸佛說法皆於身中現其色像
爾時世尊欲重宣此義而說偈言無量大千世界中
若持法華者其身甚清淨如彼淨琉璃衆生皆喜見
又如淨明鏡悉見諸色像菩薩於淨身皆見世所有
唯獨自明了餘人所不見三千世界中一切諸羣萌

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

天人阿脩羅地獄鬼畜生如是諸色像皆於身中現
諸天等宮殿乃至於有頂錢圓及彌樓摩訶彌樓山
諸大海水等皆於身中現諸佛及聲聞佛子菩薩等
若獨若在衆說法悉皆現雖未得無漏法性之妙身
以清淨常體一切於中現

論曰父母所生常體何緣清淨耶曰以分段生死
之趣而能開合自如故圓覺經曰眼根清淨根清
淨故眼識清淨識清淨故聞塵清淨聞清淨故耳
根清淨根清淨故耳識清淨識清淨故覺塵清淨
如是乃至鼻舌身意亦復如是以是知其空而言
清淨者遮空之辭也然則何以能今三千大千世

真界衆生生時死時上下好醜生善處惡處悉於中
現曰以精進之力成就自然證知晉僧佛圖澄者
天竺人也以永嘉四年至洛陽自言百餘歲腹旁
果有孔以絮塞之夜讀書則拔絮出光照室又常將
衲齋臨水從孔中引腸胃洗濯乃還納腹中以油塗
掌中使童子卽而窺之童子驚走曰是中有軍馬
未蓋照見石氏擒劉曜計其處千餘里澄亦父母所
生之常體也

復次常精進若善男子善女人如來戒後受持是經
若讀若誦若解說若書寫得千二百意功德以是清
淨意根乃至聞一偈一句通達無量無邊之義解是

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

義已能演說一句一偈至於一月四月乃至一歲諸所說法隨其義趣皆與實相不相違背若說俗間經書治世語言資生業等皆順正法三千大千世界六趣衆生心之所行心所動作心所戲論皆悉知之雖未得無漏智慧而其意根清淨如此是人有所思惟籌量言說皆是佛法無不真實亦是先佛經中所說爾時世尊欲重宣此義而說偈言

是人意清淨明利無濁穢以此妙意根知上中下法乃至聞一偈通達無量義次第如法說月四月至歲是世界內外一切諸衆生若天龍及人夜叉鬼神等其在六趣中所念若干種持法華之報一時皆悉知

十方無數佛百福莊嚴相爲衆生說法悉聞能受持思惟無量義說法亦無量終始不忘錯以持法華故悉知諸法相隨義識次第達名字語言如所知演說此人有所說皆是先佛法以演此法故於衆無所畏持法華經者意根淨若斯雖未得無漏先有如是相是人持此經安住希有地爲一切衆生歡喜而愛敬能以千萬種善巧之語言分別而說法持法華經故論曰意如幽室見何緣知其清淨耶曰以圓明了知離分別念而知之經言諸所說法隨其義趣皆與實相不相違背者圓明了知也又言若說俗間經書治世語言資生業等皆順正法者離分別念

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

也維摩詰經曰一念知一切法是道場成就一切智故圓明了知離分別念則知其空而言清淨者遮空之辭也然則何以能於三千大千世界六趣衆生心之所行心所動作心所戲論皆悉知之曰以精進之力成就自然證知唐僧義福者開元中住長安興善寺福上黨人有慧辯日誦數萬言措紳敬事之所至人施金帛以萬計皆委之而去一日謂其徒曰吾此日終兵部侍郎張洎中書侍郎嚴挺之刑部侍郎房琯禮部侍郎韋涉嘗所過從者聞福將化畢集於是陞座告別曰日晏當行張洎私謂房公曰吾餌金丹不敢臨喪乃引去福領

房公曰吾與張公相善有年其人有非常之禍名節俱喪若能終此法會庶幾可免惜哉又曰公必爲中興名臣勉之言卒而化張洎後果陷祿山而房琯翊載兩朝立大節福之意根清淨如此

無盡居士論曰隨喜功德修於現在而通於未來矣法師者以無畏心說是妙經則功德宜如何哉是人也不待受生而獲報明矣眼根八百功德耳根千二百功德鼻根八百功德舌根千二百功德身根八百功德意根千二百功德此乃父母所生肉眼耳鼻舌身意以是說經功德莊嚴六根皆令清淨眼清淨則一切悉見耳清淨則一切皆聞鼻

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

清淨則無香不辨舌清淨則無味不羨無音不妙
身清淨則如映琉璃內瑩外照意清淨則思惟言
說皆是佛法此則自利利他成已成物六根之報
豈虛也哉舊經本云身根鼻根各具千二百功德
恐梵本翻譯或藏經傳寫之誤予以海眼經文殊
偈觀音入理之門校正身鼻二根改從海眼庶行
布圓融不相違戾

妙法蓮華經常不輕菩薩品第二十

爾時佛告得大勢菩薩摩訶薩汝今當知若比丘比
丘尼優婆塞優婆夷持法華經者若有惡口罵詈誹
謗獲大罪報如前所說其所得功德如向所說眼耳

鼻舌身意清淨得大勢乃往古昔過無量無邊不可
思議阿僧祇劫有佛名威音王如來應供正徧知明
行足善逝世間解無上士調御丈夫天人師佛世尊
劫名離衰國名大成其威音王佛於彼世中爲天人
阿脩羅說法爲求聲聞者說應四諦法度生老病死
究竟涅槃爲求辟支佛者說應十二因緣法爲諸菩
薩因阿耨多羅三藐三菩提說應六波羅密法究竟
佛慧得大勢是威音王佛壽四十萬億那由他恒河
沙劫正法住世劫數如一閻浮提微塵像法住世劫
數如四天下微塵其佛饒益衆生已然後滅度正法
像法滅盡之後於此國土復有佛出亦號威音王如

來應供正徧知明行足善逝世間解無上士調御丈
夫天人師佛世尊如是次第有二萬億佛皆同一號
論曰經言乃往古昔則無有定所之辭也言無量
無邊不可思議阿僧祇劫則無有定數之辭也言
有佛名威音王如來則無有定體之辭也何以言
之曰無有定所者顯發廣大而無依無住義故無
有定數者顯發甚深而出諸數量義故無有定體
者顯發微妙而無時無性義故凡物有容斯有威
有言斯有音今尚無物而曰威乎尚無言而曰音
乎自是觀之則所謂無有定體明矣威音王佛尚
無定體而曰壽量四十萬億那由他恒河沙劫何
也而曰正法住世一閻浮提微塵數劫乃至像法
住世四天下微塵數劫何也曰以明二種法身故
然壽量之劫不爲減正法像法住世不爲增蓋非
有思惟心所能測度之境也問曰何謂二種法身
曰金剛般若論曰有一種法身一者證得法身二
者言說法身夫廣大而無依無住甚深而出諸數
量微妙而無時無性者卽證得法身也非有思惟
心所能測度之境卽言說法身也問曰經言於此
國土復有佛出亦號威音王如來何意哉曰脩多
羅有月喻曰唯一月真中間更無是月非月者以
明月有定體故於此欲發明無有定體之旨故言

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

復有佛出號威音王如來豈特二如來而已雖至
億千萬數可也故又言如是次第有二萬億佛皆
同一號夫言數者起於眇忽增至億兆參差閼略
皆所不可今自一威音如來至二自二遂及二萬
億其參差閼略如此似無意於言數者也於此又
發明無數量之旨最初威音王如來則劫名離衰
國名大成至於第二佛則曰於此國土而已其詳
簡不侔似無意於言處者也於此又欲發明其無
有定所之旨學者精研而深觀之

最初威音王如來既已滅度正法滅後於像法中增
上慢比丘有大勢力余時有一菩薩比丘名常不輕

得大勢以何因緣名常不輕是比丘凡有所見若比
丘比丘尼優婆塞優婆夷皆悉禮拜讚歎而作是言
我深敬汝等不敢輕慢所以者何汝等皆行菩薩道
當得作佛而是比丘不專讀誦經典但行禮拜乃至
遠見四衆亦復故往禮拜讚歎而作是言我不輕
於汝等汝等皆當作佛四衆之中有生瞋恚心不淨
者惡口罵詈言是無智比丘從何所來自言我不輕
汝而與我等授記當得作佛我等不用如是虛妄授
記如此經歷多年常被罵詈不生瞋恚常作是言汝
當作佛說是語時衆人或以杖木瓦石而打擲之避
走遠住猶高聲唱言我不敢輕於汝等汝等皆當作

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

佛以其常作是語故增上慢比丘比丘尼優婆塞優婆夷號之爲常不輕

論曰常不輕菩薩告人以當作佛乃遭打逐何也曰菩薩告之之心善矣而告之之辭未善也明珠白璧以暗投人於道而人猶按劍而疑之况無因而得佛位乎然則菩薩不省其辭未善而告之歟曰知之而告之以誠後世爲師者使授法當以如來世尊爲法耳佛嘗於首楞嚴會上使阿難自徵其心更七處而無得乃舉拳問之曰汝將誰見對曰我與大衆同將眼見佛言汝稱我拳曜汝心日汝目可見以何爲心而阿難乃曰現今微心所在

而我以心推窮尋逐卽能推者我將爲心佛言咄阿難此非汝心阿難於是驚矍自陳曰說此非心我實驚怖乃至佛曰我非勑汝執爲非心但汝於心微細揣摩若離前塵有分別性卽真汝心若分別性離塵無體斯則前塵分別影事塵非常住若變滅時此心卽同龜毛兔角汝法身同於斷滅其誰修證無生法忍佛之心欲阿難之悟其作佛甚於常不輕之告人也而其辭曲折如此然阿難說偈曰大雄大力大慈悲希更審除微細惑故曰常不輕告之之辭未善也晉樂廣與客飲客見盃中有蛇旣歸而病廣知其蛇蓋所坐署屋之晝也

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

不告之而復延其客於畫影之下客見盃中之蛇
畫影也其病遂瘳唐僧智永號書字工有來學者
依止二十年而去永知業未精而不告之但付一
箋曰到家當發其人中路疑而發之則磨穿之硯
數枚其人乃悟其學之未至也樂廣智永雖盃酒
技藝之間其告人也妙密如此豈常不輕菩薩告
人當作佛也而徑廷如是乎

是比丘臨欲終時於虛空中具聞威音王佛先所說
法華經二十千萬億偈悉能受持卽得如上眼根清
淨耳鼻舌身意根清淨得是六根清淨已更增壽命
二百萬億那由他歲廣爲人說是法華經於時增上

慢四衆比丘比丘尼優婆塞優婆夷輕賤是人爲作
不輕名者見其得大神通力樂說辯力大善寂力聞
其所說皆信伏隨從是菩薩復化千萬億衆令住阿
耨多羅三藐三菩提命終之後得值二千億佛皆號
日月燈明於其法中說是法華經以是因緣復值二
千億佛同號雲自在燈王於此諸佛法中受持讀誦
爲諸四衆說此經典故得是常眼清淨耳鼻舌身意
諸根清淨於四衆中說法心無所畏得大勢是常不
輕菩薩摩訶薩供養如是若干諸佛恭敬尊重讚歎
種諸善根於後復值千萬億佛亦於諸佛法中說是
經典功德成就當得作佛得大勢於意云何尔時常

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

不輕菩薩豈異人乎則我身是若我於宿世不受持
讀誦此經爲他人說者不能疾得阿耨多羅三藐三
菩提我於先佛所受持讀誦此經爲人說故疾得阿
耨多羅三藐三菩提

論曰經言是比丘臨欲終時者六根不行之時也
六根不行則爲無功又言具聞威音王佛先所說
經夫無功而聞經則爲無功之功也無功之功其
體自妙而常寂根塵所莫能間數量所莫能礙故
言二十萬億偈悉能受持卽得如上眼耳鼻舌身
意清淨得是六根清淨已更增壽命二百萬億那
由他歲修多羅有二種覺一者性覺二者本覺又

有二種般若一者本覺般若二始覺般若而此四
種之名隨義而立體則常同也首楞嚴經曰性覺
妙明本覺明妙者辭相錯以成其義謂性覺妙明
爲一切衆生現證之境不從能所而生不因修證
而起本自妙而常明者也能以始覺般若明性覺
之妙故言本覺明妙夫未以始覺般若明之則名
性覺性覺則不屬終始故也旣以始覺般若明之
則名本覺本覺則分本末故也自是觀之則三種
義而具四種名經言威音王佛則性覺之象以不
言處所但言具聞先所說經而已日月燈明佛則
本覺之象以言命終之後於其法中雲自在燈王

則始覺之象以言於此諸佛法中問曰於威音王
佛則言先所說經於日月燈明佛則言於其法中
說是經於雲自在燈王佛則言於此諸佛法中受
持讀誦爲四衆說三佛皆以說經爲言何意哉曰
顯示此本自妙而常明之體徧照法界普濟群生
使傳續無盡卽其旨也佛傳續者也故言常不輕
菩薩豈異人乎我身是已

得大勢彼時四衆比丘比丘尼優婆塞優婆夷以瞋
恚意輕賤我故二百億劫常不值佛不聞法不見僧
千劫於阿鼻地獄受大苦惱畢是罪已復遇常不輕
菩薩教化阿耨多羅三藐三菩提得大勢於汝意云

何余時四衆常輕是菩薩者豈異人乎今此會中跋
陀婆羅等五百菩薩師子月等五百比丘尼思佛等
五百優婆塞皆於阿耨多羅三藐三菩提不退轉者
是得大勢當知是法華經大饒益諸菩薩摩訶薩能
令至於阿耨多羅三藐三菩提是故諸菩薩摩訶薩
於如來滅後常應受持讀誦解說書寫是經余時世
尊欲重宣此義而說偈言

過去有佛號威音王神智無量將導一切天人龍神
所共供養是佛滅後法欲盡時有一菩薩名常不輕
時諸四衆計著於法不輕菩薩往到其所而語之言
我不輕汝汝等行道皆當作佛諸人聞已輕毀罵

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9 200

不輕菩薩能忍受之其罪畢已臨命終時得聞此經六根清淨神通力故增益壽命復爲諸人廣說是經諸著法衆皆蒙菩薩教化成就令住佛道不輕命終值無數佛說是經故得無量福漸具功德疾成佛道彼時不輕則我身是時四部衆著法之者聞不輕言汝當作佛以是因緣值無數佛此會菩薩五百之衆并及四部清信士女今於我前聽法者是我於前世勸是諸人聽受斯經第一之法開示教人令住涅槃世世受持如是經典億億萬劫至不可議時乃得聞是法華經億億萬劫至不可議諸佛世尊時說是經是故行者於佛滅後聞如是經勿生疑惑應當一心

廣說此經世世值佛疾成佛道

論曰於此論法華經之力殊勝衆生聞熏之者終必成佛雖經微塵數劫如釋迦牟尼佛而墮惡趣如跋陀羅師子月等比登覺道夫威音王佛壽量及正法像法住世已經無數塵劫而況二萬億同名之佛而常不輕菩薩聞經發心乃在最初乎如經言我於宿世不受持讀誦此經爲他人說者不能疾得阿耨多羅三藐三菩提我於先佛所受持讀誦此經爲人說故疾得阿耨多羅三藐三菩提則聞熏而信經微塵數劫終必成佛者以如比人食少金剛此金剛性不與血肉合則至地地亦不

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

能留直至金剛際而止耳經言彼時四衆乃至以瞋恚意輕賤我者二百億劫常不值佛不聞法不見僧千劫於阿鼻獄受大苦惱畢是罪已復遇常不輕菩薩教化阿耨多羅三藐三菩提者則聞熏而不信雖墮惡趣終必成佛者以此如豐城劍埋獄屋下而光芒見斗牛之間一旦發之爲希世之寶問曰信而微塵數劫終必成佛可也不信而墮惡趣矣亦曰成佛寧有是事哉曰華嚴經曰佛子爲菩薩時於兜率天宮放大光明名光幢王照十方佛刹微塵數世界彼世界中地獄衆生遇斯光者衆苦休息得十種清淨眼耳鼻舌身意亦復如是咸生歡喜踊躍稱慶從彼命終生兜率天天中有鼓名甚可愛樂彼天生已此鼓發音而告之言諸天子汝以心不放逸於如來所種諸善根往昔親近衆善知識毗盧遮那大威神力於彼命終來生此天此其證也

無盡居士論曰常不輕菩薩凡見比丘比丘尼優婆塞優婆夷禮拜讚歎言我深敬汝汝等皆行菩薩道當得作佛夫人人具足箇箇圓成行菩薩道當得作佛此妙法華經之旨也蓋善財問善知識云何行菩薩道云何修菩薩道善知識卽下座作禮以華散之則行菩薩道而作禮豈可輕之哉汝

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9 200

以吾爲狂則輕辱毀罵是汝不自信而自謗此經也然則隨喜法師功德既如彼則謗經之罪安可免乎故常不輕卽值威音王佛同說法華經二十萬億偈得六根清淨復值二千億日月燈明佛復值二千億雲自在燈王佛復值千萬億佛而成我今釋迦牟尼佛其輕賤者二百億劫常不值佛不聞法不見僧千劫於阿鼻地獄受大苦畢獲遇常不輕教化此持經謗經二者罪福之報也而佛之慈悲平等無二矣

妙法蓮華經如來神力品第二十一

爾時千世界微塵等菩薩摩訶薩從地涌出者皆於

佛前一心合掌瞻仰尊顏而白佛言世尊我等於佛滅後世尊分身所在國土滅度之處當廣說此經所以者何我等亦自欲得是真淨大法受持讀誦解說書寫而供養之爾時世尊於文殊師利等無量百千萬億舊住娑婆世界普薩摩訶薩及諸比丘比丘尼優婆塞優婆夷天龍夜叉乾闥婆阿脩羅迦樓羅緊那羅摩聯羅伽人非人等一切衆前現大神力出廣長舌上至梵世一切毛孔放於無量無數色光皆悉徧照十方世界衆寶樹下師子座上諸佛亦復如是出廣長舌放無量光釋迦牟尼佛及寶樹下諸佛現神力時滿百年然後還攝舌相一時聲歎俱共瑞

指是二音聲徧至十方諸佛世界地皆六種震動其中衆生天龍夜叉乾闥婆阿脩羅迦樓羅緊那羅摩睺羅伽人非人等以佛神力故皆見此娑婆世界無量無邊百千萬億衆寶樹下師子座上諸佛及見釋迦牟尼佛共多寶如來在寶塔中坐師子座又見無量無邊百千萬億菩薩摩訶薩及諸四衆恭敬圍繞釋迦牟尼佛既見是已皆大歡喜得未曾有

論曰舌根面相之小者而不出諸口梵天色界之極處而度越欲天經乃言廣長舌相上至梵天乎一切毛孔身之細微十方世界境之廣大經乃言光明徧滿於一切處乎夫自舌相而觀之上至梵

天者非豎窮三際耶又自毛孔而觀之徧至諸處者非橫亘十方耶然非佛自示現之如是十方分身諸佛蓋亦平爲之經復言於此一時滿百千歲則該三際十方之廣滿百千歲之久而皆見於佛說法之頃聲歎彈指皆聲之小者十方世界皆處之廣者而言是二音聲皆能徧至然非佛與分身諸佛多寶與諸菩薩見之而已一切天龍夜叉乃至人非人等亦皆見之此豈識心分別妄情裁接之境哉問曰非識心分別妄情裁接之境則是智之境歟智之境佛佛證之衆生亦有能證之者歟曰圓覺經曰一切衆生皆證圓覺逢善知識依彼

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

所作因地法行。尔時修習便有頓漸。若遇如來無上菩提正修行路。根無大小。皆成佛果。然未極真信者。當以事觀之。陳那嘗與外道論義。外道墮負化而爲石。陳那則結草肖其形而鞭之。因血流石亦吼而升空。則非有情無情之異。漢孝子蔡順負入郭。忽客至其舍。母自齧其指而順心動馳。而歸。則非有間隔之遠。唐元德秀猶子提孩失母。家貧無乳媼。而德秀乃自乳之。而乳爲之渾。則非有男女之相。漢孝子孟宗之母冬月思筍。宗泣於竹間。而筍生。則非有時節之殊。謂之不證可乎。卽時諸天於虛空中高聲唱言。過此無量無邊百千。

萬億阿僧祇世界。有國名娑婆。是中有佛名釋迦牟尼。今爲諸菩薩摩訶薩說大乘經。名妙法蓮華。教菩薩法佛所護念汝等。當深心隨喜。亦當禮拜供養。釋迦牟尼佛。彼諸衆生聞虛空中聲已。合掌向娑婆世界。作如是言。南無釋迦牟尼佛。南無釋迦牟尼佛。以種種華香。瓔珞。旛蓋。及諸嚴身之具。珍寶。妙物。皆共遙散。娑婆世界所散諸物。從十方來。譬如雲集。變成寶帳。徧覆此間。諸佛之上。于時十方世界通達無礙。如一佛土爾。時佛告上行等菩薩。大衆。諸佛神力。如是無量無邊不可思議。若我以是神力。於無量無邊百千萬億阿僧祇劫。爲囑累故說。此經功德。猶不能。

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

盡以要言之如來一切所有之法如來一切自在神力如來一切秘要之藏如來一切甚深之事皆於此經宣示顯說是故汝等於如來滅後應一心受持讀誦解說書寫如說修行

論曰耆闍崛山佛現神力之時有無量百千萬億舊住娑婆世界菩薩摩訶薩及諸比丘比丘尼優婆塞優婆夷天龍夜叉乾闥婆阿脩羅迦樓羅緊那羅摩睺羅伽人非人等一切之衆而經但言諸天於虛空中勸令深心隨喜平曰惟天性爲最利見佛所示境界廣大微妙通達無礙則先開悟自信其所證無錯謬故彌感佛恩作師子吼耳故言

高聲唱言過此無量無邊百千萬億阿僧祇世界有國名娑婆是中有佛乃至汝等當深心隨喜亦當禮拜供養釋迦牟尼佛問曰釋迦牟尼佛在此耆闍崛山中而空中之聲乃曰過此非特過此而已又言無量無邊百千萬億阿僧祇世界國名娑婆是中有佛何也曰以是佛身無有依處故何以故如前所現之境爲智智之境故智智清淨寧有限極哉佛猶以空中之聲未能發諸衆生癡暗之相則以衆莊嚴具珍寶妙物華香旛蓋散之佛上而此諸妙供養從十方來變成寶帳凡爲此者欲以開顯色心不二故何以故是所散諸妙供具無

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

有心識而能從十方來又能變而爲帳則色心不二之旨也色心不二則智智清淨故般若經曰無二無二分無別無斷故也經之微妙盡修行心數門戶故言以要言之如來一切所有之法也是無障礙不思議之境故言如來一切自在神力也不妄開示此難信之珠故言如來一切秘要之藏也人天二乘所不能知故言如來一切甚深之事也向則密說今則明告故言皆於此經宣示顯說也所在國土若有受持讀誦解說書寫如說修行若經卷所住之處若於園中若於林中若於樹下若於僧坊若白衣舍若在殿堂若山谷曠野是中皆應起塔而般涅槃尔時世尊欲重宣此義而說偈言

諸佛救世者住於大神通爲悅衆生故現無量神力舌相至梵天身放無數光爲求佛道者現此希有事諸佛聲歎聲及彈指之聲周聞十方國地皆六種動以佛滅度後能持是經故諸佛皆歡喜現無量神力囑累是經故讚美受持者於無量劫中猶故不能盡是人之功德無邊無有窮如十方虛空不可得邊際能持是經者則爲已見我亦見多寶佛及諸分身者又見我今日教化諸菩薩能持是經者令我及分身

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

滅度多寶佛一切皆歡喜十方現在佛并過去未來亦見亦供養亦令得歡喜諸佛坐道場所得秘要法能持是經者不久亦當得能持是經者於諸法之義名字及言辭樂說無窮盡如風於空中一切無障礙於如來滅後知佛所說經因緣及次第隨義如實說如日月光明能除諸幽冥斯人行世間能滅衆生暗教無量菩薩畢竟住一乘是故有智者聞此功德利益於我滅度後應受持斯經是人於佛道決定無有疑論曰經言汝等於如來滅後應一心受持讀誦解說書寫如說修行者告以親近隨順之旨也故言應一心受持今言若有受持讀誦解說書寫如說

修行則是或見親近隨順之人也親近隨順之人則能念念無間由念念無間故不與妄合由不與妄合故能遇緣卽宗於諸緣塵當處出生隨處滅盡故經言若經卷所在之處若於園中若於樹下若於僧坊若白衣舍若在殿堂若山谷曠野是中應起塔者滅盡之所也

無盡居士論曰前佛後佛皆說妙法蓮華經經有百千萬億那由他恒河沙等偈而前此演說者寶車藥草化城鑿井醉客狂子種種譬喻而不顯其法門至如來神力品而後妙法蓮華經無量句偈粲然大備所謂如來與十方世界分身諸佛一切

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

毛孔皆放無量色光皆悉徧照出廣長舌放無量光上至梵天滿百千歲還攝舌相一時聲歎俱共
殫指是二音聲徧至十方諸佛世界地皆六種震動諸天於虛空中高聲唱言釋迦牟尼佛今爲諸菩薩說大乘經名妙法蓮華衆生聞空中聲已合掌向娑婆世界遙散妙具猶如雲集變成寶帳十方通達爲一佛土尔時佛告上行等菩薩如來一切所有之法一切自在神力一切秘要之藏一切甚深之事皆於此經宣示顯說是故汝等我滅度後應一心受持讀誦解說書寫如說修行若經卷所住之處皆應起塔供養是處即是道場諸佛於

此得阿彌多羅三藐三菩提於此轉法輪於此般涅槃廣長舌者阿僧祇劫不妄語之所莊嚴也舌相至梵天者舌者宣說圓通之根超欲界而說經不可以相求也毛孔交光佛佛牙照主伴重重也滿百千歲還攝舌相者出攝久近自在在我也諸佛聲歎聲及彈指之聲周聞十方國此則諸佛說法妙而難思也地皆六種動者說法已竟動地表法也夫稱性而論則不見修行之實證執相而談則昧於忘言之妙會受持是經囑累是經意在茲乎

妙法蓮華經囑累品第二十二

爾時釋迦牟尼佛從法座起現大神力以右手摩無量菩薩摩訶薩頂而作是言我於無量百千萬億阿僧祇劫修習是難得阿耨多羅三藐三菩提法今以付囑汝等汝等應當一心流布此法廣令增益如是三摩諸菩薩摩訶薩頂而作是言我於無量百千萬億阿僧祇劫修習是難得阿耨多羅三藐三菩提法今以付囑汝等汝等當受持讀誦廣宣此法今一切衆生普得聞知所以者何如來有大慈悲無諸慳惁亦無所畏能與衆生佛之智慧如來智慧自然智慧如來是一切衆生之大施主汝等亦應隨學如來之法勿生慳惁

論曰金剛般若經曰須菩提於意云何如來於然燈佛所有法得阿耨多羅三藐三菩提不不也世尊如我解佛所說義佛於然燈佛所無有法得阿耨多羅三藐三菩提佛言如是如是須菩提實無有法如來得阿耨多羅三藐三菩提須菩提若有法如來得阿耨多羅三藐三菩提然燈佛則不與我授記汝於來世當得作佛號釋迦牟尼以實無有法得阿耨多羅三藐三菩提是故然燈佛與我授記以是觀之則佛無法與人明矣而經於此乃言如來有大慈悲無諸慳惁亦無所畏能與衆生佛之智慧如來智慧自然智慧如來是一切衆

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

生之大施主以是觀之則佛有法與人亦明矣稱性所說義相背戾如此何所折衷哉曰華嚴經曰如來明星現時忽然大悟普觀無量衆生歎曰無一衆生而不具有如來智慧德相但以妄想執著而不證得若離妄想則一切智自然智無礙智卽得現前夫妄想執著無有實相如人迷東爲西忽有悟人指示之則迷西之情自解而東方不從外來也所以如來智慧者通於迷悟言之也自然智慧蓋於迷解之時證之也能以方便指諸衆生使其迷解者佛之智慧也如來智慧爲所證佛之智慧爲能證至於自然智慧則不屬能所以不從人

得故嗚呼自然智慧不從人得則釋迦牟尼佛於然燈所但得授記而已也能以方便指諸衆生使其迷解者名佛之智慧則此經言能與衆生佛之智慧如來智慧自然智慧也不然經但言佛之智慧足矣而又言如來智慧自然智慧者諸佛妙意難以一言盡之故也

於未來世若有善男子善女人信如來智慧者當爲演說此法華經使得聞知爲令其人得佛慧故若有衆生不信受者當於如來餘深法中示教利喜汝等若能如是則爲已報諸佛之恩論曰於信如來智慧者則稱善男子善女人以是

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

知其爲根熟衆生也於不信受者則但稱其爲衆生以是知其爲根未熟衆生也金剛般若經曰須菩提恭敬而白佛言希有世尊如來善護念諸菩薩善付囑諸菩薩天親菩薩釋之曰善護念者爲根熟衆生說善付囑者爲根未熟衆生說佛之法施不遺衆生如此譬如師子王之搦象搦免其力未嘗不均也首楞嚴經曰阿難我今度汝已出生死汝遵佛言名報佛恩以其知奉持最後明訓者是爲知恩也

時諸菩薩摩訶薩聞佛作是說已皆大歡喜徧滿其身益加恭敬曲躬低頭合掌向佛俱發聲言如世尊

勅當具奉行唯然世尊願不有慮諸菩薩摩訶薩衆如是三反俱發聲言如世尊勅當具奉行唯然世尊願不有慮尔時釋迦牟尼佛令十方來諸分身佛各還本土而作是言諸佛各隨所安多寶佛塔還可如故說是語時十方無量分身諸佛坐寶樹下師子座上者及多寶佛并上行等無邊阿僧祇菩薩大衆舍利弗等聲聞四衆及一切世間天人阿脩羅等聞佛所說皆大歡喜

無盡居士論曰佛從法座起現大神力以右手三摩無量菩薩摩訶薩頂付囑以應當一心流布此法諸菩薩同聲三反如世尊勅願不有慮佛令諸

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

佛菩薩各還所安法座者不動之體也起而以右手三摩者順體以致用也頂者尊而無上也一心流布者佛無二說也同聲三反者終始相成也各還所安者本覺則徧周沙界始覺則佛佛道同也妙法蓮華經藥王菩薩本事品第二十三

爾時宿王華菩薩白佛言世尊藥王菩薩云何遊於娑婆世界世尊是藥王菩薩有若干百千萬億那由他難行苦行善哉世尊願少解說諸天龍神夜叉乾闥婆阿脩羅迦樓羅緊那羅摩睺羅伽人非人等又他國土諸來菩薩及此聲聞衆聞皆歡喜尔時佛告宿王華菩薩乃往過去無量恒河沙劫有佛號日月

淨明德如來應供正徧知明行足善逝世間解無上士調御丈夫天人師佛世尊其佛有八十億大菩薩摩訶薩七十二恒河沙大聲聞衆佛壽四萬二千劫菩薩壽命尔等彼國無有女人地獄餓鬼畜生阿修羅等及諸難地平如掌琉璃所成寶樹莊嚴寶帳覆上垂寶華旛寶瓶香爐周徧國界七寶爲臺一樹一臺其樹去臺盡一箭道此諸寶樹皆有菩薩聲聞而坐其下諸寶臺上各有百億諸天作天伎樂歌歎於佛以爲供養尔時彼佛爲一切衆生喜見菩薩及衆菩薩諸聲聞衆說法華經

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

論曰禪觀經曰藥王菩薩昔名星光嘗從日藏尊者聞說佛慧卽以雪山上藥供養衆僧而發大願願我於未來世能治一切衆生身病及與心病發是願已舉世歡喜故號藥王經言爾時佛爲一切衆生喜見菩薩及衆菩薩諸聲聞衆說法華經則知藥王菩薩因地所以號一切衆生喜見者以其本所誓願清淨廣大而致衆生歡喜故此經能爲心病者之良藥信而受持者必獲六根清淨之報聞而疑者如人入藥肆雖未服食而爲藥氣所熏有病亦損也藥王菩薩於昔能捨所愛之身莊嚴之臂則非止能治一切衆生身心諸病亦能治佛

病法病也

是一切衆生喜見菩薩樂習苦行於日月淨明德佛法中精進經行一心求佛滿萬二千歲已得現一切色身三昧

論曰華嚴十明論曰普賢菩薩恒對現色身在一切衆生前教化無有休息者十一地菩薩所利衆生等同法界隨根隨時對現色身不爲而用不作而應以普光明智不屬方所同衆生心任物現形無往來故文殊師利菩薩作象王回旋以觀善財童子者示攝受之意也蓋以大聖無方智圓形徧隨根對現不背衆生一切衆生如應見者皆如對

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

面而諸衆生各不相知皆謂聖者獨對我語耳問曰何修而能證此三昧耶曰唯以精進之力成熟無別法也精進有四種三昧一者常行二者常坐三者半行半坐四者非行非坐於是四種一向攝心念念無間經言是一切衆生喜見菩薩樂習苦行於日月淨明德佛法中精進經行一心求佛者樂習常行三昧也始自精進經行一心求佛終至對現色身在一切衆生前教化無有休息是謂精進之力成熟之效也

得此三昧已心大懽喜卽作念言我得現一切色身三昧皆是得聞法華經力我今當供養日月淨明德佛及法華經卽時入是三昧於虛空中雨曼陀羅華摩訶曼陀羅華細末堅黑栴檀滿虛空中如雲而下又兩海此岸栴檀之香此香六銖價直娑婆世界以供養佛

論曰修多羅有三法攝一切差別之義一者徧計性名分別執若得人空智則此執方遣二者依他性名法執若得法空智則此執方遣三執次第而盡則方入圓成實性解深密經曰翳眼人如徧計現青黃如依他淨眼人如圓成陳那菩薩則以智照此三法而說喻爲偈曰於藤起蛇知見藤則無境若知藤分已藤知如蛇知以藤知蛇知皆自亂

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9 200

知非本自妙而常知故何以故如人見藤似蛇爲境所誑及見藤則異相之蛇便滅此則偏計分別之心絕矣然藤者色香味觸而成析此藤則但有色香味觸而異相之藤亦滅此則依他法執之心絕矣二執已盡則圓成實性現前一切衆生喜見菩薩以得現一切色身三昧皆由苦行隨順三法將以示其體相令一切衆生皆證也故不以神力供養爲精進經言又兩海此岸栴檀之香此香六銖價直娑婆世界以供養佛者香以象神通而曰六銖則六神通也然猶與娑婆世界相直非所有現行俱無能所者也

作是供養已從三昧起而自念言我雖以神力供養於佛不如以身供養卽服諸香栴檀熏陸兜樓婆畢力迦沈水膠香又飲薺葛諸華香油滿千二百歲已香油塗身於日月淨明德佛前以天寶衣而自纏身灌諸香油以神通力願而自然身光明徧照八十億恒河沙世界其中諸佛同時讚言善哉善哉善男子是真精進是名真法供養如來若以華香瓔珞燒香末香塗香天繒旛蓋及海此岸栴檀之香如是等種種諸物供養所不能及假使國城妻子布施亦所不及善男子是名第一之施於諸施中最尊最上以法供養諸如來故作是語已而各默然其身火焚千二

1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

百歲過是已後其身乃盡一切衆生喜見菩薩作如是法供養已命終之後復生日月淨明德佛國中於淨德王家結加趺坐忽然化生卽爲其父而說偈言大王今當知我經行彼處卽時得一切現諸身三昧勤行大精進捨所愛之身

說是偈已而白父言日月淨明德佛今故現在我先供養佛已得解一切衆生語言陁羅尼復聞是法華經八百千萬億那由他甄迦羅頻婆羅阿閻婆等偈大王我今當還供養此佛白已卽坐七寶之臺上升虛空高七多羅樹往到佛所頭面禮足合十指爪以偈讚佛

容顏甚奇妙光明照十方我適曾供養今復還親觀爾時一切衆生喜見菩薩說是偈已而白佛言世尊世尊猶故在世余時日月淨明德佛告一切衆生喜見菩薩善男子我涅槃時到滅盡時至汝可安施床座我於今夜當取涅槃又勑一切衆生喜見菩薩善男子我以佛法囑累於汝及諸菩薩大弟子并阿耨多羅三藐三菩提法亦以三千大千七寶世界諸寶樹寶臺及給侍諸天悉付於汝我滅度後所有舍利亦付囑汝當令流布廣設供養應起若干千塔如是日月淨明德佛勑一切衆生喜見菩薩已於夜後分入於涅槃爾時一切衆生喜見菩薩見佛滅度悲感

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

懊惱戀慕於佛卽以海此岸栴檀爲積供養佛身而以燒之火滅已後收取舍利作八萬四千寶瓶以起八萬四千塔高三世界表刹莊嚴垂諸幡蓋懸衆寶鈴余時一切衆生喜見菩薩復自念言我雖作是供養心猶未足我今當更供養舍利便語諸菩薩大弟子及天龍夜叉等一切大衆汝等當一心念我今供養日月淨明德佛舍利作是語已卽於八萬四千塔前焚百福莊嚴臂七萬二千歲而以供養

論曰經自而自念言我雖以神力供養於佛不如以身供養乃至而各默然其身火然千二百歲過是已後其身乃盡者雖徧計分別執得人空智故

又自作如是法供養已命終之後乃至卽於八萬四千塔前焚百福莊嚴臂七萬二千歲而以供養者離依他法執得法空智故蓋身相旣盡則法執亦亡故也問曰何以言卽服諸香耶曰五欲熱惱以戒清涼之栴檀能除熱惱故言栴檀寃憎之痛以定止息之薰陸能止痛故言薰陸禪支凝結以慧發明之膠香能去瘡痏故言膠香但離虛妄名爲解脫而已兜樓婆畢力迦爲解脫而以水沈爲解脫知見也故言兜樓婆畢力迦沈水以是五種香以象戒定

110 123456789180 123456789190 123456789

慧解脫解脫知見又以薺葛諸華之香爲油塗之
以象如意也又問何以言以天寶衣而自纏身灌
以諸油以神通力願而自然其身光明徧照八十
億恒河沙世界耶曰言自然其身者非常火也以
智慧火也方其燃時根境寂照故其光明徧徹無
礙也又問曰何以言是真精進是名真法供養耶
曰以神力供養者非精進非真法供養惟以大智
慧照此身相了不可得以是不可得之妙普供十
方如來則爲真法供養也又問曰何以謂之得解
一切衆生語言陁羅尼耶曰此名入辭無礙三昧
也如經欲示身不可得則言一千二百歲焚燒其

身欲示法執不可得則言七萬二千歲復燒百福
莊嚴之臂謂此語爲真實也耶則衆生信心無自
而生謂此語爲非真實也耶則佛之無漏智所演
不應虛誑蓋言一切衆生語言者雜偽也又言陁
羅尼者真實也雜偽而真實終不可解而有解之
者故般若經曰不可解者卽般若般若非可解非
不可解是也又問身相之盡則言千二百歲法執
之盡則言七萬二千歲旣叙日月淨明德佛出生
入死又叙一切衆生喜見菩薩出生入死何意哉
曰於身相以千二百歲爲言者十二緣生所滅之
區宇也於法執以七萬二千歲爲言者七識染汙

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

所執持也身相所以言生法執所以言死以二執不出生死之域而所供養佛住世及入般涅槃無異相也

令無數求聲聞衆無量阿僧祇人發阿耨多羅三藐三菩提心皆使得住現一切色身三昧尔時諸菩薩天人阿修羅等見其無臂憂惱悲哀而作是言此一切衆生喜見菩薩是我等師教化我者而今燒臂身不具足于時一切衆生喜見菩薩於大衆中立此誓言我捨兩臂必當得佛金色之身若實不虛令我兩臂還復如故作是誓已自然還復

論曰龍勝菩薩曰無有一法定性可取故名不可

破以衆生著因緣空法故名爲可破譬如小兒見水中月愛著欲取而不可得心懷憂惱智者教言雖可眼見不可手捉但破可取不破可見經言于時菩薩於大衆中立此誓言我捨兩臂必當得佛金色之身若實不虛令我兩臂還復如故作是誓已自然還復則知圓成實智雖捨兩執而不絕滅但破可取不破可見之旨也圓覺經曰善男子彼新學菩薩安處徒衆宴坐靜室常作是念我今此身四大和合所謂髮毛爪齒皮肉筋骨髓腦垢色皆歸於地唾涕膿血津液涎沫痰淚精氣大小便利皆歸於水煖氣歸火動轉歸風四大各離今者

妄身當在何處乃至畢竟無有緣心可見者入人空觀也又言善男子彼之衆生幻身滅故乃至幻滅滅故非幻不滅譬如磨鏡垢盡明現者入法空觀也然以觀法治之而空故言垢相永滅十方清淨未見本來身心之相不可得之意故又言譬如清淨摩尼寶珠映於五色隨方各現諸愚癡者見彼摩尼實有五色善男子圓覺淨性現於身心隨類各應彼愚癡者說淨圓覺實有如是身心自相亦復如是隨類各應則千二百歲所焚之身也現於五色則七萬二千歲所焚之臂也而淨摩尼珠之體則一切衆生喜見菩薩也

由斯菩薩福德智慧淳厚所致當尔之時三千大千世界六種震動天雨寶華一切人天得未曾有佛告宿王華菩薩於汝意云何一切衆生喜見菩薩豈異人乎今藥王菩薩是也其所捨身布施如是無量百千萬億那由他數宿王華若有發心欲得阿耨多羅三藐三菩提者能焚手指乃至足一指供養佛塔勝以國城妻子及三千大千國土山林河池諸珍寶物而供養者若復有人以七寶滿三千大千世界供養於佛及大菩薩辟支佛阿羅漢是人所得功德不如一切川流江河諸水之中海爲第一此法華經亦受持此法華經乃至一四句偈其福最多宿王華譬

10123456789180123456789190123456789

復如是於諸如來所說經中最爲深大又如土山
山小鍊圍山大鍊圍山及十寶山衆山之中須彌山
爲第一此法華經亦復如是於諸經中最爲其上又
如衆星之中月天子最爲第一此法華經亦復如是
於千萬億種諸經法中最爲照明又如日天子能除
諸暗此經亦復如是能破一切不善之闇又如諸小
王中轉輪聖王最爲第一此經亦復如是於衆經中
最爲其尊又如帝釋於三十三天中王此經亦復如
是諸經中王又如大梵天王一切衆生之父此經亦
復如是一切賢聖學無學及發菩薩心者之父又如
一切凡夫人中須陀洹斯陀含阿那含阿羅漢辟支

佛爲第一此經亦復如是一切如來所說若菩薩所
說若聲聞所說諸經法中最爲第一有能受持是經
典者亦復如是於一切衆生中亦爲第一一切聲聞
辟支佛中菩薩爲第一此經亦復如是於一切諸經
法中最爲第一如佛爲諸法王此經亦復如是諸經
中王宿王華此經能救一切衆生者此經能令一切
衆生離諸苦惱此經能大饒益一切衆生充滿其願
如清涼池能滿一切諸渴乏者如寒者得火如裸者
得衣如商人得主如子得母如渡得船如病得醫如
暗得燈如貧得寶如民得王如賈客得海如炬除暗
此法華經亦復如是能令衆生離一切苦一切病痛

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

能解一切生死之縛若人得聞此法華經若自書若使人書所得功德以佛智慧籌量多少不得其邊若書是經卷華香瓔珞燒香末香塗香旛蓋衣服種種之燈酥燈油燈諸香油燈薺萄油燈須彌那油燈波羅羅油燈婆利師迦油燈那婆摩利油燈供養所得功德亦復無量宿王華若有人聞是藥王菩薩本品者亦得無量無邊功德若有女人聞是藥王菩薩本事品能受持者盡是女身後不復受若如來滅後後五百歲中若有女人聞是經典如說修行於此命終卽往安樂世界阿彌陀佛大菩薩衆圍繞住處生蓮華中寶座之上不復爲貪欲所惱亦復不爲瞋恚

愚癡所惱亦復不爲憍慢嫉妒諸垢所惱得菩薩神通無生法忍得是忍已眼根清淨以是清淨眼根見七百萬二千億那由他恒河沙等諸佛如來是時諸佛遙共讚言善哉善哉善男子汝能於釋迦牟尼佛法中受持讀誦思惟是經爲他人說所得福德無量無邊火不能焚水不能漂汝之功德千佛共說不能令盡汝今已能破諸魔賊壞生死軍諸餘怨敵皆悉摧滅善男子百千諸佛以神通力共守護汝於一切世間天人之中無如汝者唯除如來其諸聲聞辟支佛乃至菩薩智慧禪定無有與汝等者宿王華此菩薩成就如是功德智慧之力若有人聞是藥王菩薩

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

本事品能隨喜讚善者是人現世口中常出青蓮華
香身毛孔中常出牛頭栴檀之香所得功德如上所
說是故宿王華以此藥王菩薩本事品囑累於汝我
滅度後後五百歲中廣宣流布於闍浮提無令斷絕
惡魔魔民諸天龍夜叉鳩槃茶等得其便也宿王華
汝當以神通之力守護是經所以者何此經則爲闍
浮提人病之良藥若人有病得聞是經病卽消滅不
老不死宿王華汝若見有受持是經者應以青蓮華
盛滿末香供散其上散已作是念言此人不久必當
取草坐於道場破諸魔軍當吹法螺擊大法鼓度脫
一切衆生老病死海是故求佛道者見有受持是經

典人應當如是生恭敬心說是藥王菩薩本事品時
八萬四千菩薩得解一切衆生語言陀羅尼多寶如
來於寶塔中讚宿王華菩薩言善哉善哉宿王華汝
成就不可思議功德乃能問釋迦牟尼佛如此之事
利益無量一切衆生

論曰如前段經所論曰欲示身相不可得則言一
千二百歲焚燒其身欲示法執不可得則言七萬
二千歲復燒百福莊嚴之臂以明身相旣盡法執
亦亡則經之設象以達其意洞然無疑矣於此乃
言若有發心欲得阿耨多羅三藐三菩提者能然
手指乃至足一指供養佛塔則若誠勑之實然何

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

也曰亦象也言未能頓獲人空法空二種之智但如阿那舍人於分別生滅之相捨其麤執於五利使捨其身見亦可也起信論曰分別生滅相者有二種云何爲二者麤與心相應故二者細與心不相應故與心相應謂之執染之麤者經言能然手指則執已無力麤相盡矣瑜珈論曰阿那舍雖無身見於捨受時我愛現行方起則身見未全盡也經又言乃至足一指則身見未全盡之象也晉僧法羽平生誦法華經慕藥王菩薩焚身之施以白蒲坂晉王姚緒曰入道多門何必燒骸體乎曰吾願如是卽以布滌香油自纏其身誦藥王品以

登火柵又宋僧慧益有至行辟穀累年於鍾山置鑊辦油乘牛車詣雲門辭武皇帝乃入鑊據小床以油灌吉貝帽將著之帝令太宰勸曰爲道多途何必焚身耶曰本願如此不敢上煩聖慮乞度僧二十人許之卽誦藥王品火至眉聳猶分光明日帝爲設齋建寺號藥王嗚呼法羽慧益視不貲之軀如薪芻讀此品未熟之悞也豈不哀哉問曰經言說是藥王菩薩本事品時八萬四千菩薩得解一切衆生語言施羅尼衆生語言何以復言施羅尼乎曰一切聖教以四法爲體謂名身文身句身語身也蓋先以慣習相領解故爲四聞持流布今

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

法久住故三世如來正法賴此名文句語等防閼
世間雜採無義之論一切聖教譬如牛乳以醉發
之久而成酪世間雜採無義之論譬驢乳其色與
牛乳同至裂之則成不潔今言一切衆生語言陁
羅尼者非分別智識所到之境何以故以一切聖
教攝之陁則名一切衆生語言以世間文書攝之
陁則名陁羅尼如安樂行品則曰世俗文筆讚詠
外書皆不當親近所言外書則非正法也而法師
品又曰若說世間經書治世語言資生業等皆順
正法自是觀之則聲音語言豈有實相哉此士惟
棗柏大士得解一切衆生語言陁羅尼其論華嚴

經也則曰文殊師利居東北方清涼山者艮卦也
艮爲小男主東北方故艮爲小男爲童蒙爲文殊
常化凡夫啓蒙見性及本智之初首故又與普賢
俱在東方卯位卯爲震卦也震爲長男又像日出
東方春陽發萌無物不生無物不照理智雙徹體
一無二如日出東方無物不照春陽發萌無物不
生以根本智差別智無別體用生萬行故子爲佛
位丑爲信位寅爲十住卯爲十行辰爲十回向巳
爲十地午爲等覺未爲晦明入俗同俗化迷申酉
成亥爲所化此真人辭無礙三昧游戲於衆生語
言陁羅尼者也而義學之師聞之豎毛喪氣蓋龍

象覽踏非驢所堪也

無盡居士論曰如來既付囑若經卷所住之處皆應起塔供養宿王華菩薩卽問藥王菩薩云何遊於娑婆世界佛告宿王華乃往過去無量劫有佛號日月淨明德彼佛爲一切衆生喜見菩薩等說法華經是一切衆生喜見菩薩樂習精進滿萬二千歲得現一切色身三昧以種種香華供養已又以香油灌身然後以供養命終於此佛國化生於淨德王家而白父言我先供養日月淨明德佛聞說法華經八百千萬億那由他等偈卽往作禮偈讚彼佛彼佛滅後收舍利起八萬四千塔又然兩臂

供養發誓願言我捨兩臂必得佛金色之身作是誓已臂復如本余時喜見卽藥王菩薩是也于時會中聞說藥王菩薩本事品者所得功德無量無邊而況於親爲藥王乎供養奉事若行捨愛所獲報身如此然猶未離有爲之果不如受持此經一四句偈其福最多此我佛囑累之至也

妙法蓮華經合論卷第六

音釋

王相下云去聲稀音喜詬許候施金上去洎音冀喪去參差上云去聲下云平聲林切更七平能間去聲
劫下沒烏切切漁女卓無間去聲六子六聲

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

法華經合論卷第七

妙法蓮華經合論卷第七

經 姚秦三藏法師鳩摩羅什 譯

論 宋寶覺圓明禪師惠洪 造

撰

妙法蓮華經妙音菩薩品第二十四

爾時釋迦牟尼佛放大人相肉髻光明及放眉間白毫相光徧照東方百八萬億那由他恒河沙等諸佛世界過是數已有世界名淨光莊嚴其國有佛號淨華宿王智如來應供正徧知明行足善逝世間解無上士調御丈夫天人師佛世尊爲無量無邊菩薩大衆恭敬圍繞而爲說法釋迦牟尼佛白毫光明徧照

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

其國爾時一切淨光莊嚴國中有一菩薩名曰妙音久已植衆德本供養親近無量百千萬億諸佛而悉成就甚深智慧

論曰放大人相肉髻光明者開示頂法故及放眉間白毫相光者顯發中道義故頂法無上而覆以肉髻無自見相無他見相故眉間毫相不高不下而適於中故前文佛亦放眉間白毫相光止照東方萬八千土此則加以肉髻之光徧照東方至八萬億那由他恒河沙等諸佛世界蓋其廣大殊勝十倍過之也問曰肉髻之光廣大殊勝足矣何必更放眉間之光乎曰欲顯發中道義則示因緣

果報靈驗之瑞耳如前所論如是因緣果報本末究竟等者非爲中道義爲第一義也如前所放眉間毫相光者密示無量義處三昧之體如人以指指月也而今放眉間毫相光者顯示因緣果報靈驗之瑞又如以指月之指染羹也若謂此指但可指月不可染羹則陋矣妙音菩薩因中以十萬種伎樂供養雲雷音王佛故今成菩薩號妙音又以八萬四千寶鉢爲施故今獲種種三昧眷屬莊嚴又以解一切衆生語言陀羅尼故今得一切色身三昧其因果報施之清淨非止如此而已夫大人相者大相海也有三十二種大人之相八十種隨

形之好較其勝異自足至頂倍倍增勝徧體毛孔
功德不及一好衆好功德不及一相衆相功德不
及眉間毫相功德而肉髻功德冠於諸相此淨業
之相從弟子孝順其師所致而放此光所召弟子
則又知染羨之指或可以燃楊柳枝也其因果報
施之清淨又非止於如此而已諸佛國土皆以金
繩界道寶樹行列而爲莊嚴獨此佛國唯以淨光
莊嚴豈妙音菩薩所成就法因中清淨殊勝而致
然邪寶鉢清淨之器一切衆生語言陁羅尼無分
別智之光也維摩經曰因其心淨卽佛土淨夫豈
不然哉

得妙幢相三昧法華三昧淨德三昧宿王戲三昧無
緣三昧智印三昧解一切衆生語言三昧集一切功
德三昧清淨三昧神通游戲三昧慧炬三昧莊嚴王
三昧淨光明三昧淨藏三昧不共三昧日旋三昧得
如是等百千萬億恒河沙等諸大三昧釋迦牟尼佛
光煥其身卽白淨華宿王智佛言世尊我當往詣娑
婆世界禮拜親近供養釋迦牟尼佛及見文殊師利
法王子菩薩藥王菩薩勇施菩薩宿王華菩薩上行
意菩薩莊嚴王菩薩藥上菩薩

論曰此十六種三昧十地菩薩所遊行處唯證乃
知其未證者但以一切聖教而知如道路之人聞

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

從都邑來者說紛華盛麗雖非目見猶賢於不聞
唐僧窺基者曰妙幢相者如幢高顯衆德莊嚴故
法華者達一佛乘法故淨德者斷雜染得勝德故
宿王戲者如星之光明如王之遊戲以是三昧開
悟衆生故無緣者卽滅盡定無所緣定離攀緣故
智印者以智爲印印三世一念無始終故解衆生
語言者卽詞無礙定離一切分別故集一切功德
者卽集福王定得如意自在故清淨者能生七淨
九淨四淨等故四淨則所謂所依淨所緣淨及心
淨智淨也神通遊戲者卽資發變化定以能起大
神通故慧炬者照明真俗諸境界故莊嚴王者能

具内外莊嚴故淨光明者放神光故淨藏者含衆
德故不共者不共二乘得故日旋者如日之明徧
照四生故三昧者正定也華嚴論曰冬至之月爲
一陽十二月爲二陽正月爲三陽則三爲定也方
五蘊冥昧未有分別時則昧爲定也圓覺經又曰
三昧正受則於正定中不受諸受故

爾時淨華宿王智佛告妙音菩薩汝莫輕彼國生下
劣想善男子彼娑婆世界高下不平土石諸山穢惡
充滿佛身卑小諸菩薩衆其形亦小而汝身四萬二
千由旬我身六百八十萬由旬汝身第一端正百千
萬福光明殊妙是故汝往莫輕彼國若佛菩薩及國

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

土生下劣想妙音菩薩白其佛言世尊我今詣娑婆世界皆是如來之力如來神通遊戲如來功德智慧莊嚴於是妙音菩薩不起于座身不動搖而入三昧以三昧力於耆闍崛山去法座不遠化作八萬四千衆寶蓮華闇浮檀金爲莖白銀爲葉金剛爲鬚甄杵迦賓以爲其臺爾時文殊師利法王子見是蓮華而白佛言世尊是何因緣先現此瑞有若干千萬蓮華闇浮檀金爲莖白銀爲葉金剛爲鬚甄杵迦賓以爲其臺爾時釋迦牟尼佛告文殊師利是妙音菩薩摩訶薩欲從淨華宿王智佛國與八萬四千菩薩圍繞而來至此娑婆世界供養親近禮拜於我亦欲供養

聽法華經文殊師利白佛言世尊是菩薩種何善本修何功德而能有是大神通行何三昧願爲我等說是三昧名字我等亦欲勤修行之行此三昧乃能見是菩薩色相大小威儀進止惟願世尊以神通力彼菩薩來令我得見爾時釋迦牟尼佛告文殊師利此久滅度多寶如來當爲汝等而現其相時多寶佛告彼菩薩善男子來文殊師利法王子欲見汝身于時妙音菩薩於彼國沒與八萬四千菩薩俱共發來所經諸國六種震動皆悉雨於七寶蓮華百千天樂不鼓自鳴目如廣大青蓮華葉正使和合百千萬月其面貌端正復過於此身真金色無量百千功德莊

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

嚴威德熾盛光明照曜諸相具足如那羅延堅固之
 身入七寶臺上升虛空去地七多羅樹諸菩薩衆恭
 敬圍繞而來詣此娑婆世界者閻崛山到已下七寶
 臺以價直百千瓔珞持至釋迦牟尼佛所頭面禮足
 奉上瓔珞而白佛言世尊淨華宿王智佛問訊世尊
 少病少惱起居輕利安樂行不四大調和不世事可
 忍不衆生易度不無多貪欲瞋恚癡嫉妬慳憮不
 無不孝父母不敬沙門邪見不善心不攝五情不世
 尊衆生能降伏諸魔怨不久減度多寶如來在七寶
 塔中來聽法不又問訊多寶如來安隱少惱堪忍久
 住不世尊我今欲見多寶佛身惟願世尊示我令見

爾時釋迦牟尼佛語多寶佛是妙音菩薩欲得相見
 時多寶佛告妙音言善哉善哉汝能爲供養釋迦牟
 尼佛及聽法華經并見文殊師利等故來至此爾時
 華德菩薩白佛言世尊是妙音菩薩種何善根修何
 功德有是神力佛告華德菩薩過去有佛名雲雷音
 王多陀阿伽度阿羅訶三藐三佛陀國名現一切世
 間劫名喜見妙音菩薩於萬二千歲以十萬種伎樂
 供養雲雷音王佛并奉上八萬四千七寶鉢以是因
 緣果報今生淨華宿王智佛國有是神力華德於汝
 意云何爾時雲雷音王佛所妙音菩薩技樂供養奉
 上寶器者豈異人乎今此妙音菩薩摩訶薩是華德

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

是妙音菩薩已曾供養親近無量諸佛久植德本又值恒河沙等百千萬億那由他佛

論曰文殊師利菩薩於耆闍崛山釋迦牟尼佛法座之前見八萬四千蓮華皆衆寶所成就光明開敷問佛所以發現之瑞而佛告之曰有妙音菩薩者當自淨華宿王智佛國而來也於是文殊師利有願見妙音之意而致詞焉佛許之曰多寶佛當爲汝現其相卽時多寶佛謂妙音曰文殊師利欲見汝身自是觀之則多寶佛蓋與妙音周旋之舊也不然何以能與文殊爲地哉已而妙音見釋迦牟尼佛則有詞曰久滅度多寶如來在七寶塔中

來聽法不又致辭于多寶如來曰安隱少惱堪忍久住不乃白釋迦牟尼佛曰我今欲見多寶佛於是佛語多寶如來曰妙音菩薩欲得相見自是觀之則妙音方藉釋迦牟尼佛爲之先容以求見多寶如來則蓋雅未相識矣文殊則求於多寶願見妙音而妙音則求於釋迦轉語多寶則其不相知明矣然前則嘗與妙音相語是其已相識亦明矣釋迦多寶之兩佛文殊妙音之二菩薩旣已相語矣而不相知經之旨其安在哉曰皆象也亦此品叙因緣果報靈驗之瑞然因緣果報之相皆無生之相故也何以知之華嚴經文殊師利問覺首菩

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

薩言佛子心性是一云何見有種種差別所謂往
善趣惡趣諸根滿缺受生同異端正醜陋苦樂不
同業不知心心不知業受不知報報不知受心不
知受受不知心因不知緣緣不知因智不知境境
不知智時覺首菩薩以頌答曰仁今問是義爲曉
悟童蒙我如其性答惟仁應諦聽諸法無作用亦
無有體性是故彼一切各各不相知譬如有河中水
湍流競奔逝各各不相知諸法亦如是亦如大火
聚猛燄同時發各各不相知諸法亦如是又如長
風起遇物成鼓扇各各不相知諸法亦如是又如
衆地界展轉因依住各各不相知諸法亦如是眼

耳鼻舌身心意諸情根以此常流轉而無能轉者
法性本無生亦現而有生是中無能現亦無所現
物眼耳鼻舌身心意諸情根一切空無性妄心分
別有如理而觀察一切皆無性法眼不思議此見
非顛倒若實若不實若妄若非妄世間出世間但
有假言說以是頌證因緣果報靈驗之瑞弗差毫
髮而求其作用體相皆不可得文殊根本智也一
切衆生因之而迷因之而悟圓覺會中首問本起
因地法行者也釋迦報身佛也般若會上謂衆曰
我於一切法無所執故報得常光一尋者也釋迦
文殊則因緣果報之象而不相知因緣果報之無

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

生也多寶如來寂滅之體自心之象妙音菩薩清淨之行無作妙力淨業之象然亦不相知心不知業業不知心而心與業皆無生也

華德汝但見妙音菩薩其身在此而是菩薩現種種身處處爲諸衆生說是經典或現梵王身或現帝釋身或現自在天身或現大自在天身或現天大將軍身或現毗沙門天王身或現轉輪聖王身或現諸小王身或現長者身或現居士身或現宰官身或現婆羅門身或現比丘比丘尼優婆塞優婆夷身或現長者居士婦女身或現宰官婦女身或現婆羅門婦女身或現童男童女身或現天龍夜叉乾闥婆阿脩羅

迦樓羅緊那羅摩睺羅伽人非人等身而說是經諸有地獄餓鬼畜生及衆難處皆能救濟乃至於王後宮變爲女身而說是經華德是妙音菩薩能救護娑婆世界諸衆生者是妙音菩薩如是種種變化現身在此娑婆國土爲諸衆生說是經典於神通變化智慧無所損減是菩薩以若干智慧明照娑婆世界今一切衆生各得所知於十方恒河沙世界中亦復如是若應以聲聞形得度者現聲聞形而爲說法應以辟支佛形得度者現辟支佛形而爲說法應以菩薩形得度者現菩薩形而爲說法應以佛形得度者卽現佛形而爲說法如是種種隨所應度而爲現形乃

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

至應以滅度而得度者示現滅度華德妙音菩薩摩訶薩成就大神通智慧之力其事如是爾時華德菩薩白佛言世尊是妙音菩薩深種善根世尊是菩薩住何三昧而能如是在所變現度脫衆生佛告華德菩薩善男子其三昧名現一切色身妙音菩薩住是三昧中能如是饒益無量衆生說是妙音菩薩品時與妙音菩薩俱來者八萬四千人皆得現一切色身三昧此娑婆世界無量菩薩亦得是三昧及陀羅尼爾時妙音菩薩摩訶薩供養釋迦牟尼佛及多寶佛塔已還歸本土所經諸國六種震動雨寶蓮華作百千萬億種種伎樂既到本國與八萬四千菩薩圍繞

至淨華宿王智佛所白佛言世尊我到娑婆世界饒益衆生見釋迦牟尼佛及見多寶佛塔禮拜供養又見文殊師利法王子菩薩及見藥王菩薩得勤精進力菩薩勇施菩薩等亦令是八萬四千菩薩得現一切色身三昧說是妙音菩薩來往品時四萬二千天子得無生法忍華德菩薩得法華三昧

論曰於此叙一切色身三昧一切色身三昧者所證之法而以妙音菩薩爲能證之人故經言善男子其三昧名現一切色身妙音菩薩住是三昧中也蓋慈善根力冥熏法界故能不動真際應迹十方經言妙音菩薩其身在此而是菩薩現種種身

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

爲諸衆生說是經者推涅槃經三機之義若合符契所謂聖行天行梵行爲三種慈悲妙音於此三機能圓應之故言或現梵王身或現帝釋身或現自在天身乃至或現優婆塞優婆夷身者以天行慈悲應其機而令其各各自然見如是身也又言或現長者居士婦女身或現婆羅門婦女身乃至摩睺羅伽人非人等身而爲說是經諸有地獄餓鬼畜生及衆難處皆能救濟乃至於王後宮變爲女身而說是經者以聖行慈悲應其機而令其各各自然見如是身施是無畏事也又言若應以聲聞形得度者現聲聞形而爲說法應以辟支佛形

得度者現辟支佛形而爲說法乃至如是種種隨所應度而現其形乃至應以減度而得度者示現減度者以梵行慈悲應其機而令其各各自然見如是身也是所謂現一切色身三昧皆依慈善根力故華嚴經曰諸菩薩摩訶薩以一念智普知三世一念遍入一切三昧如來智日常照其心於一切法無有分別了一切佛悉皆平等如來及我一切衆生等無有二知一切法自性清淨無有思慮無有動搖而能普入一切世間離諸分別住佛法印悉能開悟一切衆生所言無有思慮無有動搖者卽妙音菩薩其身在此之意也所言而能普入

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

一切世間者卽而是菩薩現種種身處處爲諸衆生說是經之意也

無盡居士張商英論曰宣說此經不離六根合掌恭敬以身說法也作是思惟以意說法也瞻仰世尊以眼說法也聞未曾有以耳說法也聞香悉知以鼻說法也宣說顯示舌說法也六門說法苟非舌出妙音耳聞普聞則開示悟入於斯路絕此妙音菩薩觀世音菩薩二品所以次於囑累之後也佛放大人相肉髻光及眉間白毫相光徧照東方百八萬億那由他恒河沙等諸佛世界過是數已有世界名淨光莊嚴其國有佛號淨華宿王智有

一菩薩名曰妙音久已成就百千萬億諸大三昧白彼佛而來禮拜親近釋迦佛及見文殊藥王勇施宿王華等菩薩前此放光止於萬八千今放光百倍而又倍之者光愈遠世界愈不可窮非妙音孰宣之哉故於普門品曰妙音觀世音梵音海潮音此二菩薩現一切天龍四衆等應身說法功德略同蓋說而知之聞而修之所以成此經之終也觀世音以聞思修入佛法不曰聞而曰觀所謂耳如眼眼如鼻鼻如舌一根返源而六根解脫矣妙法蓮華經觀世音菩薩普門品第二十五

爾時無盡意菩薩卽從座起偏袒右肩合掌向佛而

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

作是言世尊觀世音菩薩以何因緣名觀世音佛告無盡意菩薩善男子若有無量百千萬億衆生受諸苦惱聞是觀世音菩薩一心稱名觀世音菩薩卽時觀其音聲皆得解脫

論曰一切音聲語言之相從耳所聞之境一切形色分別之相從眼所見之境是諸衆生無始戲論六妄分隔而成於自分境不相踰越而經言觀其音聲皆得解脫則是以眼觀聲音語言之相也聲音語言之相若可以眼觀而了別則形色差殊之相亦可以耳聞而成就矣耳不可見形色差殊之相則眼豈能觀聲音語言之相乎而名爲觀世音

者根境俱絕非特見聞之境俱絕而已凡六根所對之境皆然故言皆得解脫也首楞嚴經曰觀世音菩薩卽從座起頂禮佛足而白佛言世尊憶念我昔於無數恒河沙劫於時有佛出現於世名觀世音我從彼佛發菩提心彼佛教我從聞思修入三摩地初於聞中入流亡所入既寂動靜二相了然不生如是漸增聞所聞盡盡聞不住覺所覺空空覺極圓空所空滅生滅既滅寂滅現前問曰何以分生滅寂滅乎曰如鐘鼓俱擊而不同知此不同者卽生滅之法也然知鐘非鼓鼓亦非鐘兩者之聲同時而不相參卽寂滅也問曰觀世音之

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

名義幸已聞其旨然勸請說法菩薩名無盡意其必有謂也邪曰示度生必乘願力故爾阿差末經曰菩薩行六波羅密四攝法等種種妙行誓度衆生衆生界盡菩薩之意乃盡衆生未盡菩薩之意無盡故名無盡意也

若有持是觀世音菩薩名者設入大火火不能燒由是菩薩威神力故若爲大水所漂稱其名號卽得淺處若有百千萬億衆生爲求金銀琉璃碑磲瑪瑙珊瑚琥珀真珠等寶入於大海假使黑風吹其船舫飄墮羅刹鬼國其中若有乃至一人稱觀世音菩薩名者是諸人等皆得解脫羅刹之難以是因緣名觀世

音若復有人臨當被害稱觀世音菩薩名者彼所執刀杖尋段段壞而得解脫若三千大千國土滿中夜叉羅刹欲來惱人聞其稱觀世音菩薩名者是諸惡鬼尚不能以惡眼視之况復加害設復有人若有罪若無罪杻械枷鎖檢繫其身稱觀世音菩薩名者皆悉斷壞卽得解脫若三千大千國土滿中怨賊有一商主將諸商人資持重寶經過險路其中一人作是唱言諸善男子勿得恐怖汝等應當一心稱觀世音菩薩名號是菩薩能以無畏施於衆生汝等若稱名者於此怨賊當得解脫衆商人聞俱發聲言南無觀世音菩薩稱其名故卽得解脫無盡意觀世音菩薩

摩訶薩威神之力巍巍如是

論曰脩多羅曰假使百千劫所作業不亡因緣會遇時果報還自受則經之所叙遭水火之焚溺入羅刹之鬼國臨刑致寇鎖禁桎梏經歷險難虎狼牠虺之怖邂逅冤仇呪咀毒藥之厄皆其定業會遇因緣者也而經言誦持觀世音名皆得解脫審如此義則百千劫不亡之論爲非若如百千劫不亡之論則此義可疑也何以明之曰涅槃經曰未入佛法名決定業已入佛法名不定業金剛般若經曰若有善男子善女人受持讀誦此經若爲人輕賤是人先世罪業應墮惡道以今世人輕賤故

先世罪業則爲消滅當得阿耨多羅三藐三菩提夫所謂業者果何物哉若有決定則不可轉重以爲輕而登佛果矣方其未受持經則有惡道可墮則涅槃經所言未入佛法者也及其既受持經矣則有佛果可得則涅槃經所言已入佛法者也自是而觀之則業之體相遂離生滅如空中華而瑜伽論又曲折其詞曰業有二種一定異熟業謂思業若作若增長業二不定異熟業謂故思已作而不增長故思已作猶言悔作之也蓋諸作不增長業若無追悔不修對治當可受果名增長業若追悔等則名不增長然則於所作不亡之業會遇險

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

難之中稱觀世音菩薩名者追悔之謂也菩薩之愛念苦難衆生如慈母之不忘念其亡子子佚蕩不歸無懷仰慈母之意則百年莫由相見亡子猛省念母疾馳而返則見慈母必矣衆生之哀號於菩薩大悲願力其忍不一援手哉首楞嚴三昧經曰佛告堅意有一藥樹名曰除滅大軍鬪時有無量人爲毒箭所中是時良醫持藥王樹用金鼓面於衆人中擊之出聲無量毒箭一時自拔諸佛菩薩住首楞嚴三昧力故有人稱名懷念之者無量罪垢自然除滅如醍醐能愈衆患經言觀世音菩薩摩訶薩威神之力巍巍如是者首楞嚴三

昧之力歟

若有衆生多於婬欲常念恭敬觀世音菩薩便得離欲若多瞋恚常念恭敬觀世音菩薩便得離瞋若多愚癡常念恭敬觀世音菩薩便得離癡無盡意觀世音菩薩有如是等大威神力多所饒益是故衆生常應心念若有女人設欲求男禮拜供養觀世音菩薩便生福德智慧之男設欲求女便生端正有相之女宿植德本衆人愛敬無盡意觀世音菩薩有如是力若有衆生恭敬禮拜觀世音菩薩福不唐捐是故衆生皆應受持觀世音菩薩名號無盡意若有人受持六十二億恒河沙菩薩名字復盡形供養飲食衣服

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

臥具醫藥於汝意云何是善男子善女人功德多不無盡意言甚多世尊佛言若復有人受持觀世音菩薩名號乃至一時禮拜供養是二人福正等無異於百千萬億劫不可窮盡無盡意受持觀世音菩薩名號得如是無量無邊福德之利

論曰彌勒菩薩曰貪瞋嫉妬放逸憍慢自以爲明不知是暗放逸味著欲而加貪多於媱欲者也嫉妬爲執礙而加憍慢多於愚癡者也瞋而恚則多於瞋者也三者皆暗相衆生顛倒反以爲明觀世音亦名光世音能以智慧破諸結業之暗故經偈曰無垢清淨光慧日破諸暗寶積經曰佛言譬如今

然燈一切黑暗皆自無有無所從來去無所至非東方來去亦不至南西北方四維上下不從彼來去亦不至而此燈明無有是念我能滅暗但因燈明法自無暗明暗俱空無作無取如是迦葉實智慧生無智便滅智與無智二相俱空無作無取迦葉譬如千歲冥室未曾見明若燃燈時於意云何暗寧有念我久住此不欲去邪不也世尊若燃燈時是闇無力而不欲去必當磨滅如是迦葉百千萬劫又習結業以一實觀卽皆消滅其燈明者聖智慧是其暗相者諸結業是故經言若有衆生多於媱欲常念恭敬觀世音菩薩便得離欲若多瞋

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

恚常念恭敬觀世音菩薩便得離瞋若多愚癡常
念恭敬觀世音菩薩便得離癡謂是故也問曰然
則何以求男女者亦隨願而獲邪曰此無作妙力
自在成就者也夫無作妙力無生滅相但應衆生
自心清淨則能隨其所願使之成就智嚴經曰譬如
如大地瑠璃所成帝釋毗闍延宮殿供具等影現
其中闇浮提人見瑠璃地諸宮殿影合掌供養燒
香散華願我得生如是宮殿我當遊戲如帝釋等
彼之衆生不知此地是宮殿影乃布施持戒修諸
功德爲得如是宮殿果報文殊師利如此宮殿實
無生滅以地淨故影現其中彼宮殿影亦有亦無
言常念恭敬者所求必獲也

不生不滅菩薩無作妙力實無生滅所求男女之
影亦有亦無但以女人心淨故能現也無生無滅
則無與無奪亦有亦無心淨則見不淨則無故經
言常念恭敬者所求必獲也

無盡意菩薩白佛言世尊觀世音菩薩云何遊此娑
婆世界云何而爲衆生說法方便之力其事云何佛
告無盡意菩薩善男子若有國土衆生應以佛身得
度者觀世音菩薩卽現佛身而爲說法應以辟支佛
身得度者卽現辟支佛身而爲說法應以聲聞身得
度者卽現聲聞身而爲說法應以梵王身得度者卽
現梵王身而爲說法應以帝釋身得度者卽現帝釋

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

身而爲說法應以自在天身得度者卽現自在天身而爲說法應以大自在天身得度者卽現大自在天身而爲說法應以天大將軍身得度者卽現天大將軍身而爲說法應以毗沙門身得度者卽現毗沙門身而爲說法應以小王身得度者卽現小王身而爲說法應以長者身得度者卽現長者身而爲說法應以居士身得度者卽現居士身而爲說法應以宰官身得度者卽現宰官身而爲說法應以婆羅門身得度者卽現婆羅門身而爲說法應以比丘比丘尼優婆塞優婆夷身得度者卽現比丘比丘尼優婆塞優婆夷身而爲說法應以長者居士宰官婆羅門婦女皆號之爲施無畏者

身得度者卽現婦女身而爲說法應以童男童女身得度者卽現童男童女身而爲說法應以天龍夜叉乾闔婆阿脩羅迦樓羅緊那羅摩睺羅伽人非人等身得度者卽皆現之而爲說法應以執金剛神得度者卽現執金剛神而爲說法無盡意是觀世音菩薩成就如是功德以種種形遊諸國土度脫衆生是故汝等應當一心供養觀世音菩薩是觀世音菩薩摩訶薩於怖畏急難之中能施無畏是故此娑婆世界皆號之爲施無畏者

論曰妙音菩薩以解一切衆生語言陀羅尼得現色身三昧而觀世音菩薩以聞思修入三摩地故

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

對現色身皆非意識所到之境唯慈善根力之所成就涅槃經曰我欲涅槃於初發足向拘尸那城有五百力士於其中路平治掃洒中有一石衆欲舉弃盡力不能我時憐愍卽起慈心彼諸力士尋卽見我以足拇指舉此大石擲置虛空還以手接安置右掌吹令碎牘復還聚合令彼力士貢高心息卽爲略說種種法要令其俱發阿耨多羅三藐三菩提心善男子如來余時實不以指舉此大石在虛空中還置右掌吹令碎牘復合如本善男子當知卽是如來慈善根力令諸力士見如是事此則三十二應身所以圓具也問曰何以謂之應以

此身得度者卽現此身而爲說法乎曰唐文宗嗜蛤蜊大和中沿海官吏先時送進人亦勞止一日御饌中有不可擘者帝以其異卽焚香禱之俄變爲菩薩形梵相具足乃貯以金粟檀香合覆以美錦賜興善寺令衆僧瞻禮因問群臣斯何祥邪或言太一山僧惟政者於佛法博聞強識於是召至問其事對曰臣聞物無虛應此乃啓陛下信耳故契經曰應以此身得度者卽現此身而爲說法帝曰苦薩身則已現然未聞說法政曰陛下睹此爲奇瑞而敬信之乎帝曰朕實深信惟政者賀曰陛下已聞法竟於是皇情欣悅得未曾有詔天下寺

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

院各立觀世音像以荅殊休又問曰何以謂之施
 無畏者宋僧求那跋羅者此云功德賢中天竺人
 也以元禧十二年至建業爲南譙王義宣所敬王
 有逆謀諫之至流涕王雖不聽亦不敢怒梁山之
 敗墮江水中一心誦觀世音菩薩手捉竹杖顧見
 童子牽其衣曰汝小兒乃能爾邪卽及岸脫衲衣
 欲賞之而童子忽失所在嗚呼菩薩之出文宗御
 饌童子之牽衣求那跋羅衲衣何自而至哉
 無盡意菩薩白佛言世尊我今當供養觀世音菩薩
 卽解頸衆寶珠瓔珞價直百千兩金而以與之作是
 言仁者受此法施珍寶瓔珞時觀世音菩薩不肯受

之無盡意復白觀世音菩薩言仁者愍我等故受此
 瓔珞爾時佛告觀世音菩薩當愍此無盡意菩薩及
 四衆天龍夜叉乾闥婆阿脩羅迦樓羅緊那羅摩睺
 羅伽人非人等故受是瓔絡卽時觀世音菩薩愍諸
 四衆及於天龍人非人等受其瓔絡分作二分一分
 奉釋迦牟尼佛一分奉多寶佛塔無盡意觀世音菩
 薩有如是自在神力遊於娑婆世界爾時無盡意菩
 薩以偈問曰

世尊妙相具我今重問彼佛子何因緣名爲觀世音
 具足妙相尊偈答無盡意汝聽觀音行善應諸方所
 弘誓深如海歷劫不思議侍多千億佛發大清淨願

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

我爲汝略說聞名及見身心念不空過能滅諸有苦
假使興害意推落大火坑念彼觀音力火坑變成池
或漂流巨海龍魚諸鬼難念彼觀音力火坑變成池
或在須彌峯爲人所推墮念彼觀音力如日虛空住
或被惡人逐墮落金剛山念彼觀音力不能損一毛
或值怨賊繞各執刀加害念彼觀音力咸卽起慈心
或遭王難苦臨刑欲壽終念彼觀音力刀尋段段壞
或囚禁枷鎖手足被杻械念彼觀音力釋然得解脫
呪詛諸毒藥所欲害身者念彼觀音力還著於本人
或遇惡羅刹毒龍諸鬼等念彼觀音力時悉不敢害
若惡獸圍繞利牙爪可怖念彼觀音力疾走無邊方

蛇及蝮蠍氣毒烟火然念彼觀音力尋聲自回去
雲雷鼓掣電降雹注大雨念彼觀音力應時得消散
衆生被困厄無量苦逼身觀音妙智力能救世間苦
具足神通力廣修智方便十方諸國土無刹不現身
種種諸惡趣地獄鬼畜生生老病死苦以漸悉令滅
真觀清淨觀廣大智慧觀悲觀及慈觀常願常瞻仰
無垢清淨光慧日破諸暗能伏灾風火普明照世間
悲體戒雷震慈意妙大雲澍甘露法雨滅除煩惱餒
諍訟經官處怖畏軍陣中念彼觀音力衆怨悉退散
妙音觀世音梵音海潮音勝彼世間音是故須常念
念念勿生疑觀世音淨聖於苦惱死厄能爲作依怙

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

具一切功德慈眼視衆生福聚海無量是故應頂禮爾時持地菩薩卽從座起前白佛言世尊若有衆生聞是觀世音菩薩品自在之業普門示現神通力者當知是人功德不少佛說是普門品時衆中八萬四千衆生皆發無等等阿耨多羅三藐三菩提心

論曰謂之法施珍寶瓔珞者非世之瓔珞也瓔珞莊嚴之具也無盡意欲施之言仁者愍我等故受此瓔珞者著其願之至也觀世音卽時愍諸四衆及天龍人非人等受其瓔珞者示其悲之相也如經前文釋迦牟尼佛入多寶佛塔並座而坐者示生而無生之象多寶佛久已滅度而言爲聽法華

經來者滅而不滅之象夫生而無生滅而不滅則自心之體法身佛也無盡意則大願也而又著其願之意觀世音則大悲也而又示其悲之相而瓔珞則莊嚴之具經之旨其以悲願莊嚴法身也歟

何以深切著明也故言受其瓔珞分作二分一分奉釋迦牟尼佛一分奉多寶佛塔者如此

無盡居士論曰勝彼世間音者出世之音也慈眼視衆生者聞其音而觀之也無盡意聞說觀世音菩薩因緣以瓔珞上觀世音觀世音順佛勑而受之分作二分一分奉釋迦牟尼一分奉多寶佛塔此則慈悲救苦之功歸於二佛而持經功德不必

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

重以言宣也妙音來往品者說之者或語或默故
也觀音普門品者聞之者無滅無生故也二品相
須則此經廣布矣

妙法蓮華經陁羅尼品第二十六

爾時藥王菩薩卽從座起偏袒右肩合掌向佛而白
佛言世尊若善男子善女人有能受持法華經者若
讀誦通利若書寫經卷得幾所福佛告藥王若有善
男子善女人供養八百萬億那由他恒河沙等諸佛
於汝意云何其所得福寧爲多不甚多世尊佛言若
善男子善女人能於是經乃至受持一四句偈讀誦
解義如說修行功德甚多爾時藥王菩薩白佛言世

尊我今當與說法者陁羅尼呪以守護之卽說呪曰

安爾一易爾二摩禰三摩摩禰四盲隸五遮梨弟六

賒咩七

賒履多瑋八羶帝九目帝十目多履十一姿履

阿煩婆履十二來履十三娑履十四

五义裔十五阿义裔十六阿义裔十七阿

耆膩十八羶帝十九賒履二十陁羅尼廿一

阿盧伽婆娑跋蕉廿二阿便哆邏彌履剃廿三阿薺哆波

隸輸地廿四漚究隸廿五年究隸廿六阿羅隸廿七波羅隸廿八

首迦差廿九阿三磨三履卅佛陀毗吉利泰帝卅一達磨

波利差帝卅二僧伽涅瞿沙禰卅三婆舍婆舍輸地卅四易

哆邏卅五易哆邏又夜多卅六郵樓哆卅七郵樓哆嬌舍略卅八

惡义邏卅九惡义冶多冶四十阿婆盧四十一阿摩若那多四十二

九

九

九

九

九

九

九

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

夜三

世尊是陁羅尼神呪六十二億恒河沙等諸佛所說若有侵毀此法師者則爲侵毀是諸佛已時釋迦牟尼佛讚藥王菩薩言善哉善哉藥王汝愍念擁護此法師故說此陁羅尼於諸衆生多所饒益爾時勇施菩薩白佛言世尊我亦爲擁護讀誦受持法華經者說陁羅尼若此法師得是陁羅尼若夜叉若羅刹若富單那若吉蔗若鳩槃茶若餓鬼等伺求其短無能得便卽於佛前而說呪曰

痖隸一摩訶痖隸二郁枳三目枳四阿隸五阿羅婆
第六涅隸第七涅隸多婆第八伊緝梶九韋緝梶十

盲緝梶十一涅隸墀梶十二涅犁墀婆底十三

世尊是陁羅尼神呪恒河沙等諸佛所說亦皆隨喜若有侵毀此法師者則爲侵毀是諸佛已爾時毗沙門天王護世者白佛言世尊我亦爲愍念衆生擁護此法師故說是陁羅尼卽說呪曰

阿黎一那黎二菟那黎三阿那盧四那履五拘那履六世尊以是神呪擁護法師我亦自當擁護持是經者今百由旬內無諸衰患爾時持國天王在此會中與千萬億那由他乾闥婆衆恭敬圍繞前詣佛所合掌白佛言世尊我亦以陁羅尼神呪擁護持法華經者卽說呪曰

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

阿伽禰 一伽禰 二瞿利 三乾陀利 四旃陀利 五摩蹉
者 大常求利 七浮樓莎泥 八頰底 九

世尊是陁羅尼神呪四十二億諸佛所說若有侵毀
此法師者則爲侵毀是諸佛已爾時有羅刹女等一
名藍婆二名毗藍婆三名曲齒四名華齒五名黑齒
六名多髮七名無厭足八名持瓔珞九名皇帝十名
眷屬俱詣佛所同聲白佛言世尊我等亦欲擁護讀
誦受持法華經者除其衰患若有伺求法師短者令
不得便卽於佛前而說呪曰

伊提履

一

伊提汎

二

伊提履

三

阿提復

四

伊提履

五

泥履 六 泥履 七 泥履 八 泥履 九 泥履 十 樓醯
十一 樓醯 十二 樓醯
十三 樓醯
十四 樓醯
十五 樓醯
十六 樓醯
十七 樓醯
十八 樓醯
十九 樓醯
二十 樓醯

寧上我頭上莫惱於法師若夜叉若羅刹若餓鬼若
富單那若吉蔗若毗陁羅若健馱若烏摩勒伽若阿
跋摩羅若夜叉吉蔗若人吉蔗若熱病若一日若二
日若三日若四日若至七日若常熱病若男形若女
形若童男形若童女形乃至夢中亦復莫惱卽於佛
前而說偈言

若不順我呪惱亂說法者頭破作七分如阿梨樹枝
如殺父母罪亦如壓油殃斗秤欺誑人調達破僧罪

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

犯此法師者當獲如是殃。

諸羅刹女說此偈已白佛言世尊我等亦當身自擁護受持讀誦修行是經者今得安隱離諸衰患消衆毒藥佛告諸羅刹女善哉善哉汝等但能擁護受持法華名者福不可量何況擁護具足受持供養經卷華香瓔珞抹香塗香燒香旛蓋技樂熒種種燈蘇燈油燈諸香油燈蘇摩那華油燈薺葛華油燈婆師迦華油燈優鉢羅華油燈如是等百千種供養者皇帝汝等及眷屬應當擁護如是法師說是陀羅尼品時六萬八千人得無生法忍。

論曰舊疏曰昔有婬人之子智而多瞋逃至他國

以有智故謁其國王給之曰我亦鄰國之王子也以失愛於父王流離失所而歸大王大王幸哀憐之彼國王愛其舌辯又聞其亦王者之子使沐浴衣冠與子弟遊久之以女妻之女難其多瞋俄聞有客自其國來遣人問婬人子之家世且告之曰吾夫好瞋柰何客默笑祝之曰若當瞋時卽爲說偈曰毋浪遊他國欺誑一切人食麤亦常事何必作瞋婬人子方瞋妻卽前跪說此偈於是默然不復瞋然其妻及餘人但聞其偈不知其意呢亦如是謂之密默語非也又曰如王有所欲卽索先陁婆如欲飲水先陁婆卽汲水以獻之如欲乘馬

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

先陀婆卽馭以獻之在廷之臣屬皆莫能知之而有智之臣獨知之呪亦如是亦非也然則何以謂之呪哉曰陀羅尼者總持也天親菩薩曰以念慧爲體以少略密無義文字神力所加靈驗莫測此說近矣如涉公爲符堅致雨以呪爲檄以檄其龍龍爲下鉢中而雨隨至龍則有情識者也如佛圖澄以呪爲石勒致奇瑞而青蓮輒華鉢中青蓮則無情識者也龍可檄而至蓮其可檄而華哉若以有思惟心籌量是事非愚卽狂嗚呼豈無心無理乃能得萬物之情歟豈特萬物之情天地鬼神亦莫能違也而佛於惡世弘經者謂菩薩當護持之

而藥王勇施二菩薩毗沙門天王持國天王及羅刹女毗藍婆等皆願以呪守護者豈非以其爲少略密無義文字而神力所加者乎

無盡居士論曰陀羅尼者此云總持皆是先佛所說威靈不測謂之神降制諸魔知其所由謂之呪藥王得之於六十二億恒河沙佛勇施菩薩得之於恒河沙佛持國天王乾闥婆衆得之於四十二億諸佛毗沙門天王十羅刹女與鬼子母各於佛前說呪擁護讀誦受持是經者若不如是魔強法弱豈可久住於世間哉

妙法蓮華經妙莊嚴王本事品第二十七

爾時佛告諸大衆乃往古世過無量無邊不可思議阿僧祇劫有佛名雲雷音宿王華智多陀阿伽度阿羅訶三藐三佛陀國名光明莊嚴劫名喜見彼佛法中有王名妙莊嚴其王夫人名曰淨德有二子一名淨藏二名淨眼

論曰華嚴論曰爲真智慧無體性不能自知無性故爲無性之性不能自知無性故名無明金剛藏菩薩曰不了第一義故號無明將以真智慧本無性故不能自了是以諸佛更須示現出世說法利樂人天本無衆生可度旣先賢得道利樂世間明知真智要得了緣方能現也問曰誰爲了緣乎曰

唯善知識是衆生成佛了緣如下文曰當知善知識者是大因緣所謂化導令得見佛然善知識之示教善利當用四法以攝化一切衆生使其淳熟乃可入道一名利行二名布施三名愛語四名同事經於此品示其法故言雲雷音宿王華智佛者利行也有王名妙莊嚴者布施也其王夫人名淨德者愛語也有二子一名淨藏二名淨眼者同事也何以知之曰以經辭意之著知之所謂利行者利他人之行也雲舍潤以慈致雨雷音怒以威發生故言雲雷音舒光所以破暗開敷所以結實故言宿王華智宿王謂月天子也以是知利行爲雲

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

雷音宿王華智佛也所謂布施者捨所甚難也金
剛般若論曰施有二種報未來有大福德於今衆
羨歸往福德則莊嚴義衆羨歸往則王者義以是
知布施爲妙莊嚴王也所謂愛語者卑柔巽順故
以夫人言之愛人以德而語和羨故言愛語以是
知愛語爲淨德夫人也所謂同事者非獨善者必
與人同故言二子深藏若虛故謂之藏曉了無惑
故謂之眼以是知同事爲淨藏淨眼也此釋其象
耳至於深義則見於下文雜阿含經云善知識者
如貞良妻善知識者如宗親財善知識者如商主
道善知識者如子卧父懷蓋妻貞良則愛其夫非

愛語乎財出於宗親則不匱非布施乎商主道之
則必有以利我非利行乎子卧父懷則信之至也
非同事乎

是二子有大神力福德智慧久修苦薩所行之道所
謂檀波羅密尸羅波羅密羼提波羅密毗離耶波羅
密禪波羅密般若波羅密方便波羅密慈悲喜捨乃
至三十七品助道法皆悉明了通達又得苦薩淨三
昧日星宿三昧淨光三昧淨色三昧淨照明三昧長
莊嚴三昧大威德藏三昧於此三昧亦悉通達爾時
彼佛欲引導妙莊嚴王及愍念衆生故說是法華經
時淨藏淨眼二子到其母所合十指爪掌白言願母

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

往詣雲雷音宿王華智佛所我等亦當侍從親近供
養禮拜所以者何此佛於一切天人衆中說法華經
宜應聽受母告子言汝父信受外道深著婆羅門法
汝等應往白父與共俱去淨藏淨眼合十指爪掌白
母我等是法王子而生此邪見家母告子言汝等當
憂念汝父爲現神變若得見者心必清淨或聽我等
往至佛所於是二子念其父故涌在虛空高七多羅
樹現種種神變於虛空中行住坐卧身上出水身下
出火身下出水身上出火或現大身滿虛空中而復
現小小復現大於空中滅忽然在地入地如水履水
如地現如是等種種神變令其父王心淨信解時父

見子神力如是心大歡喜得未曾有合掌向子言汝
等師爲是誰誰之弟子二子白言大王彼雲雷音宿
王華智佛今在七寶菩提樹下法座上坐於一切世
間天人衆中廣說法華經是我等師我是弟子父語
子言我今亦欲見汝等師可共俱往於是二子從空
中下到其母所合掌白母父王今已信解堪任發阿
耨多羅三藐三菩提心我等爲父已作佛事願母見
聽於彼佛所出家修道爾時二子欲重宣其意以偈
白母

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

母卽告言聽汝出家所以者何佛難值故於是二子
白父母言善哉父母願時往詣雲雷音宿王華智佛
所親近供養所以者何佛難得值如優曇鉢羅華又
如一眼之龜值浮木孔而我等宿福深厚生值佛法
是故父母當聽我等令得出家所以者何諸佛難值
時亦難遇彼時妙莊嚴王後宮八萬四千人皆悉堪
任受持是法華經淨眼菩薩於法華三昧久已通達
淨藏菩薩已於無量百千萬億劫通達離諸惡趣三
昧欲令一切衆生離諸惡趣故其王夫人得諸佛集
三昧能知諸佛秘密之藏二子如是以方便力善化
其父令心信解好樂佛法於是妙莊嚴王與群臣眷

屬俱淨德夫人與後宮采女眷屬俱其王二子與四
萬二千人俱一時共詣佛所到已頭面禮足繞佛三
匝却住一面爾時彼佛爲王說法示教利喜王大歡
悅爾時妙莊嚴王及其夫人解頸真珠瓔珞價直百
千以散佛上於虛空中化成四柱寶臺臺中有大寶
床敷百千萬天衣其上有佛結跏趺坐放大光明爾
時妙莊嚴王作是念佛身希有端嚴殊特成就第一
微妙之色

論曰四攝深義願遂聞之曰所謂同事而經必言
二子者如前文長者之念窮子則曰密遣二人無
威德者經必言生邪見家者脫珍御服著弊垢衣

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

執持糞器狀若所畏之謂也六波羅密者三乘菩薩不刊之行脩多羅名曰六度此經獨於淨藏淨眼所行之行六度之外增方便波羅密豈同事化人者必以方便爲先乎此則件唱其名至於爲其父現十八變令其父王心生信解則施其方便之用也經必言二子化其父王捨邪見已卽白其母俱求出家者蓋同事方便權也權以濟事事濟則捨之固其所也所謂利行而經必言彼佛欲導妙莊嚴王及愍念衆生故說法華經者利他無先以法利相濟故又言彼佛爲王說法示教利喜王大歡悅乃至於四衆中稱其精進受記其成佛終告

之曰善知識是大因緣所以開發激勸而安慰之者皆利他之行也所謂愛語而經必言母告子言汝父信受外道深著婆羅門法而囑令當現神變幸其見之必發信心者愛其夫之至也然不自化其夫必語其子令往化之者其愛語之指也所謂布施而經必言時父見子神力如是心大歡喜得未曾有者悔其歸向之晚之辭也於是妙莊嚴王與群臣眷屬俱淨德夫人與後宮妓女俱其王之二子與四萬二千人俱一時共詣佛所者淨德夫人及王二子皆正見者王今與之俱至佛所則捨邪見而歸正法之意見於此矣施有二種謂財施

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

法施也捨其所學婆羅門法則法施也解頸真珠
 瓔珞價直百千以散佛上則財施也經必言爾時
 妙莊嚴王及其夫人施真珠瓔珞則是布施而及
 愛語豈非愛語亦布施之法類耶謂以羨辭至意
 生其善心故經言真珠瓔珞於虛空中化成四柱
 寶臺者布施必生慈悲喜捨四無量心何以知四
 柱寶臺爲四無量心之象如前文方便波羅密之
 下便言慈悲喜捨乃至三十七品助道法故也臺
 中有寶床者於是四無量心當以法空爲座言床
 則座之辭變也敷百千萬天衣者又當以忍辱深
 自覆護之耳問曰布施而以慈悲喜捨助發之足

矣更令觀法空持忍辱何也曰施之行爲難若住
 心則退墮舍利弗初欲修六度發心施內外所有
 忽一婆羅門從求眼睛舍利弗欣然取以付之婆
 羅門輒以投于地曰我以爲寶珠光明可愛不知
 其腥血彈耳以脚踐碎之而去於是舍利弗念曰
 不用則已何至脚壞踐之也因是退墮四十劫若
 能觀法空持忍辱而以慈悲喜捨助發施心則名
 不住相布施故言有佛結加趺坐放大光明金剛
 般若經曰須菩提若菩薩心住於法而行布施如
 人入暗則無所見若菩薩心不住法而行布施如
 人有目日光明照見種種色此其證也

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

時雲雷音宿王華智佛告四衆言汝等見是妙莊嚴
王於我前合掌立不此王於我法中作比丘精勤修
習助佛道法當得作佛號娑羅樹王國名大光劫名
大高王其娑羅樹王佛有無量菩薩衆及無量聲聞
其國平正功德如是其王卽時以國付弟與夫人二
子并諸眷屬於佛法中出家修道王出家已於八萬
四千歲常勤精進修行妙法華經過是已後得一切
淨功德莊嚴三昧卽昇虛空高七多羅樹而白佛言
世尊此我二子已作佛事以神通變化轉我邪心令
得安住於佛法中得見世尊此二子者是我善知識
爲欲發起宿世善根饒益我故來生我家爾時雲雷

音宿王華智佛告妙莊嚴王言如是如是如汝所言
若善男子善女人種善根故世世得善知識其善知
識能作佛事示教利喜今入阿耨多羅三藐三菩提
大王當知善知識者是大因緣所謂化導令得見佛
發阿耨多羅三藐三菩提心大王汝見此二子不此
二子已曾供養六十五百千萬億那由他恒河沙諸
佛親近恭敬於諸佛所受持法華經愍念邪見衆生
令住正見妙莊嚴王卽從虛空中下而白佛言世尊
如來甚希有以功德智慧故頂上肉髻光明顯照其
眼長廣而紅青色眉間毫相白如珂月齒白齊密常
有光明脣色赤好如頻婆果爾時妙莊嚴王讚歎佛

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

如是等無量百千萬億功德已於如來前一心合掌復白佛言世尊未曾有也如來之法具足成就不可思議微妙功德教戒所行安隱快善我從今日不復自隨心行不生邪見慳慢瞋恚諸惡之心說是語已禮佛而出佛告大眾於意云何妙莊嚴王豈異人乎今華德菩薩是其淨德夫人今佛前光暉莊嚴相菩薩是哀愍妙莊嚴王及諸眷屬故於彼中生其二子者今藥王菩薩藥上菩薩是是藥王藥上菩薩成就如此諸大功德已於無量百千萬億諸佛所植衆德本成就不可思議諸善功德若有人識是二菩薩名字者一切世間諸天人民亦應禮拜佛說是妙莊嚴王

王本事品時八萬四千人遠塵離垢於諸法中得法眼淨

論曰經言其王卽時以國付弟與夫人二子并諸眷屬於佛法中出家修道者謂四攝法皆衆生所欲因其所欲而施方便化令成佛故維摩經曰先以欲勾牽後令入佛智布施之心非同事教化罕能自發借能自發亦宿世善知識勸導熏習之力成熟所致非愛語稱贊莫能輔助激其勇銳故經言王出家已乃至二子者是我善知識爲欲發起宿世善根饒益我故來生我家然二子之能施是方便蓋其母淨德夫人其實使之問曰妙莊嚴王

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

於此贊佛佛三十二大人之相八十種隨形之好
獨稱肉髻之光明照其眼眉間毫相映其口何也
曰以此品亦示因緣果報故也故經言妙莊嚴王
豈異人乎今華德菩薩是其淨德夫人今佛前光
照莊嚴相菩薩是乃至其二子者今藥王藥上菩
薩是也如肉髻光明示頂法微密唯佛能見故稱
眼眉間毫相示中道義則因緣果報所以巧譬善
導之者未能忘言故又稱口也問曰前文或曰得
一切衆生語言三昧或曰得無生法忍或曰得法
華三昧或曰得現色身三昧或曰發無等等阿耨
多羅三藐三菩提心獨此品但曰八萬四千人遠

塵離垢於諸法中得法眼淨而已何也曰以此證
知所示者四攝法耳四攝之法方便導助之體故
其得之者不過遠塵離垢於諸法中法眼清淨耳
無盡居士論曰甚矣正法之難信難解也既示之
以罪福之報又示之以神通自在之力舉藥王身
命布施之因以昭其供養之果集妙音殊妙眷屬
以起其希有之心發惡趣鬼神誓願說兜以固其
護持之力可謂丁寧審諦矣猶以爲未也故又因
會中藥王藥上菩薩舉其宿命以告勑大衆雲雷
音宿王華智佛者往古無量不可思議劫之佛也
雲雷音者德蔭萬物聲震十方者也宿王者宿植

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

善根而至尊也華智者開敷妙慧以嚴智體者也有王名妙莊嚴者雖學外道而聰利易化也其夫人曰淨德者清淨不染可以導引也有二子一名淨藏一名淨眼淨藏者淨而包含者也淨眼者淨而偏照者也王學外道而二子出家此則過去受佛付囑護持法華經者以願力故來爲父子情親語通善巧引導回其邪心破其邪見然後父母二子及其臣民眷屬妓女反然歡喜知佛難值如優曇鉢華相與出家當作娑羅樹王佛而二子者今藥王藥上是也如是則佛說妙莊嚴王本事品時八萬四千人遠塵離垢於諸法中得法眼淨不其然乎

妙法蓮華經普賢菩薩勸發品第二十八

爾時普賢菩薩以自在神通力威德名聞與大菩薩無量無邊不可稱數從東方來所經諸國普皆震動雨寶蓮華作無量百千萬億種種技樂又與無數諸天龍夜叉乾闥婆阿脩羅迦樓羅緊那羅摩睺羅伽人非人等大衆圍繞各現威德神通之力到娑婆世界者闍崛山中頭面禮釋迦牟尼佛右遶七匝白佛言世尊我於寶威德上王佛國遙聞此娑婆世界說法華經與無量無邊百千萬億諸菩薩衆共來聽受唯願世尊當爲說之若善男子善女人於如來滅後

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

云何能得是法華經佛告普賢菩薩若善男子善女人成就四法於如來滅後當得是法華經一者爲諸佛護念二者植衆德本三者入正定聚四者發救一切衆生之心善男子善女人如是成就四法於如來滅後必得是經爾時普賢菩薩白佛言世尊於後五百歲濁惡世中其有受持是經典者我當守護除其衰患令得安隱使無伺求得其便者若魔若魔子若魔女若魔民若爲魔所著者若夜叉若羅刹若鳩槃荼若毗舍闍若吉蔗若富單那若韋陀羅等諸惱人者皆不得便是人若行若立讀誦此經我爾時乘六牙白象王與大菩薩衆俱詣其所而自現身供養守

護安慰其心亦爲供養法華經故是人若坐思惟此經爾時我復乘白象王現其人前其人若於法華經有所忘失一句一偈我當教之與共讀誦還令通利余時受持讀誦法華經者得見我身甚大歡喜轉復精進以見我故卽得三昧及陀羅尼名爲旋陀羅尼百千萬億旋陀羅尼法音方便陀羅尼得如是等陀羅尼

論曰智度論曰普賢菩薩一一毛孔常出諸佛世界及諸菩薩遍滿十方以化衆生無的住處則普賢菩薩爲難見難知也而此經乃言普賢菩薩以自在神通力威德名聞與大菩薩無量無邊不可

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

稱數從東方來則普賢菩薩又若易知易見也經之旨安在哉曰菩薩之於一切衆生以悲願之力故無所棄遺雖至愚暗者僅別方隅亦可授法非必奇英神穎者也如學者不識文殊普賢及觀世音之義則問其師師曰汝識東方乎萬物發生之始如萬行之增長此普賢住處也又曰汝識西方乎萬物肅殺之所以悲救之此觀世音住處也又曰汝識東北方乎東北萬物之所終始之位如因智而迷因智而悟此文殊住處也以是觀之皆言其所易見易知所以勸發之若示之以高深昭之以微妙則彼將望崖而返尚何能悅聞而願從之

耶推智度論所言普賢無的住處以信華嚴論所示曰十地道滿見普賢行以十地中三昧三度倍倍入無量三昧畢竟不見普賢身及所有境界況如來果後常行普賢行十方國土悉遍於中功德如何可見哉則果難見難知也經言是人若行若立讀誦此經乃至若坐思惟此經我皆乘六牙白象王與大菩薩俱詣其所現身於其人前何十地菩薩入無量三昧乃不能見而凡夫衆生四威儀中讀誦受持法華經便能見之耶嗚呼是亦易見易知之意也宋僧普明者精嚴誦持不捨晝夜每至此品必見菩薩乘白象王與諸眷屬威光照曜

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

現於其前菩薩豈欺予哉所言法華三昧旋陀羅尼者諸佛甚深境界謂如走波回旋而爲渦則必極深處也亦名旋復海三昧無量三昧中之王也乃言以見我身故卽得之豈佛甚深三昧三賢十聖菩薩莫能測知而以一見普賢則便得之乎此又以易解之語勸發之也經言我於寶威德上王佛國遙聞此娑婆世界說法華經則是已聞之矣及見佛則爲俱來菩薩勤請曰願佛當爲說之此又晦其廣大無量神通之力百千微妙三昧知見之力而示以未聞之相以勸發之也凡此皆普賢所行之妙行一切菩薩莫能知其意而佛獨知之

故告之曰善男子善女人成就四法於如來滅後當得是法華經一者爲諸佛護念二者植衆德三者入正定聚四者發救一切衆生之心夫諸佛護念則志樂佛乘者也植衆德本則集諸善法者也入正定聚則常不忘念者也發救一切衆生之心則有淨願者也新學菩薩於是四法如人之飲食服用不可一日缺者何待佛言而後知耶憂學耆域者天竺人也以惠帝時至洛陽久之會洛中亂將西歸僧竺法行請曰願乞一言終身行之乃集道俗升座曰守口攝身意慎勿犯衆惡修行一

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9 200 1 2 3 4 5 6 7 8 9 210

切善如是得度世言訖默然法行曰願聞所未聞之法若此偈八歲童子能誦之域笑曰八歲能誦百歲不行不行而誦之何益哉人皆知敬得道者不知行之自得道於是掣肘徑去域可謂知授法之要得佛菩薩之遺意者也

世尊若後世後五百歲濁惡世中比丘比丘尼優婆塞優婆夷求索者受持者讀誦者書寫者欲修習是法華經於三七日中應一心精進滿三七日已我當乘六牙白象與無量菩薩而自圍繞以一切衆生所喜見身現其人前而爲說法示教利喜亦復與其陀羅尼呪得是陀羅尼故無有非人能破壞者亦不爲

女人之所惑亂我身亦自常護是人惟願世尊聽我說此陀羅尼呪卽於佛前而說呪曰

阿檀地一檀阿婆地二檀阿婆帝三檀阿鳩舍四隸
檀五阿脩陀隸六脩陀羅婆底七佛馱波彌
爾八薩婆陀羅尼九阿婆多尼十薩婆婆沙十一阿婆多尼十二阿脩陀羅婆底十三阿僧祇十四僧伽婆伽地十五帝隸阿脩僧伽兜略十六盧
阿羅帝波羅帝十七薩婆僧伽地十八三摩地十九伽蘭地二十薩婆達磨脩波利刹帝二十一薩婆薩埵樓駄橋舍略二十二阿僕伽地二十三辛阿毗吉利地帝二十四世尊若有菩薩得聞是陀羅尼者當知普賢神通之

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

力若法華經行闇浮提有受持者應作此念皆是普賢威神之力若有受持讀誦正憶念解其義趣如說修行當知是人行普賢行於無量無邊諸佛所深種善根爲諸如來手摩其頭若但書寫是人命終當生忉利天上是時八萬四千天女作衆技樂而來迎之其人卽著七寶冠於妓女中娛樂快樂何況受持讀誦正憶念解其義趣如說修行若有人受持讀誦解其義趣是人命終爲千佛授手令不恐怖不墮惡趣卽往兜率天上彌勒菩薩所彌勒菩薩有三十二相大菩薩衆所共圍繞有百千萬億天女眷屬而於中生有如是等功德利益是故智者應當一心自書若

使人書受持讀誦正憶念如說修行世尊我今以神通力故守護是經於如來滅後闇浮提內廣令流布使不斷絕尙時釋迦牟尼佛讚言善哉善哉普賢汝能護助是經令多所衆生安樂利益汝已成就不可思議功德深大慈悲從久遠來發阿耨多羅三藐三菩提意而能作是神通之願守護是經我當以神通力守護能受持普賢菩薩名者普賢若有受持讀誦正憶念修習書寫是法華經者當知是人則見釋迦牟尼佛如從佛口聞此經典當知是人供養釋迦牟尼佛當知是人佛讚善哉當知是人爲釋迦牟尼佛手摩其頭當知是人爲釋迦牟尼佛衣之所覆

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

論曰經叙受持讀誦修習書寫而正憶念者則親見佛而聞法者也謂於此經不忘念則爲見佛見佛爲難况復口聞經典况復得佛讚嘆况復受其摩頂况復蒙以衣覆蓋愛念親信悲憐保護之至也華嚴經曰德雲比丘語善財童子曰我得憶念諸佛智慧光明門以止心勿念妄想不生正慧現前名爲憶念以正慧與一切諸佛無相妙理合故以此無相正慧現前普照心境身見邊見等五見總亡萬境虛寂見亡業謝名爲光明故言憶念諸佛智慧光明門所謂則見釋迦牟尼佛者身合也所謂如從口聞者語合也供養釋迦牟尼佛者意

合也嗚呼能不忘念則與佛身語意合學者當盡心焉

如是之人不復貪著世樂不好外道經書手筆亦復不喜親近其人及諸惡者若屠兒若畜猪羊雞狗若獵師若銜賣女色是人心意質直有正憶念有福德力是人不爲三毒所惱亦不爲嫉妒我慢邪慢增上慢所惱是人少欲知足能修普賢之行普賢若如來滅後後五百歲若有人見受持讀誦法華經者應作是念此人不久當詣道場破諸魔衆得阿耨多羅三藐三菩提轉法輪擊法鼓吹法螺雨法雨當坐天人大衆中師子法座上普賢若於後世受持讀誦是經

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

典者是人不復貪著衣服卧具飲食資生之物所願不虛亦於現世得其福報若有人輕毀之言汝狂人耳空作是行終無所獲如是罪報當世世無眼若有供養讚歎之者當於今世得現果報若復見受持是經者出其過惡若實若不實此人現世得白癩病若輕笑之者當世世牙齒疎缺齶唇平鼻手脚繚戾眼目角睞身體臭穢惡瘡膿血水腹短氣諸惡重病是故普賢若見受持是經典者當起遠迎當如敬佛說是普賢勸發品時恒河沙等無量無邊菩薩得百千萬億旋陀羅尼三千大千世界微塵等諸菩薩具普賢道佛說是經時普賢等諸菩薩舍利弗等諸聲聞

及諸天龍人非人等一切大會皆大歡喜受持佛語作禮而去

論曰此段經文義大略如安樂行品蓋佛最後清淨明誨也外道經書手筆誠勿貪著者以其於正憶念爲滲漏耳譬如近城之乳乳味淡故諸惡境界誠勿親近者以其是障道增上之緣恐緣差故佛之意惟欲汝山間林下經行燕默破衣壞衲隨緣粥飯其心自然清淨其身自然閒暇此隨順法華三昧之要門也經言如是之人心意質直正憶念有福德力渠不信夫

無盡居士論曰世尊說法文殊普賢未嘗不在獨

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

此法會十方無量無邊諸大菩薩皆集而說法已竟普賢菩薩始從東方寶威德上王佛國來聽受又問善男子善女人於佛滅後云何能得是經佛告普賢如來滅後成就四法當得是經一者爲諸佛護念二者植衆德本三者入正定聚四者發拔一切衆生之心如是成就必得是經然則不待受持讀誦解說而得之則行此四法不求經而經自得矣此普賢請問於佛而勸發後人也佛言若法華經行闍浮提有受持者應作是念皆是普賢威神之力闍浮提者乃吾此一天下也昔思大和尚於法華經不通利夢普賢乘六牙白象來摩其頂

遂證法華三昧此乃行於闍浮提之感應歟妙法蓮華經合論卷第七

音釋

竇郎自給他亥妻去聲

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

重刻妙法蓮華經合論跋語

宋覺範洪禪師有法華論行於世達觀師為余言之構之十年矣而不得余於覺範著述已得披覩僧寶林間智證諸書愛其議論直截痛快能為人解粘去縛獨不是書慕之頗切一日詣楞嚴靜室達觀師出以示余云得之精嚴僧舍余喜甚欲狂不意至寶再耀於世因得盡讀之夫世尊

出現為說法華諸大弟子等得度記荊為悟法華然蓮華是喻至於既為妙法則七軸文字中竟無一語說破欲於此旁施註腳大難大難覺範此論大都就自己所悟印正法華橫說豎說無不如意而亦未嘗有一語說破讀是論者當從不說破處猛着精采忽然撥破靈山一會儼然未散始信覺範老人漒心太切若束於教者見其

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

貶駁人師操戈相向遺其天機而索其玄
 黃牝牡豈敢謂盡無哉每品末有張商英
 附論一篇議論亦直截可喜足以羽翼覺
 範鏤板完達觀師已先期北去是書流通
 想見其欣；於數千里外也時
 明萬曆乙酉冬十一月晦日淨心居士馮
 夢禎書於淨業堂

吏部侍郎姚弘謨助銀伍兩

貴州提學副使色檉芳助銀拾兩

翰林院編脩馮夢楨助銀拾兩

嘉興縣知縣顧雲程助銀伍兩

秀水縣知縣陳九德助銀伍兩

長洲縣知縣魯鳳儀助銀拾兩

嘉興鄉進士色世杰助銀拾兩

吳江吳氏助銀拾兩薦父吳邦棟母徐氏



170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

大正丙午年仲秋
嘉慶惟士子并恭請
王氏御史公
嘉慶惟士子并恭請
王氏御史公
嘉慶惟士子并恭請
王氏御史公
嘉慶惟士子并恭請
王氏御史公

廿

廿五

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9